


文苑英華

七



謝息
賀
薦舉
進貢

子苑
美華

六百三十一之六
四十

文苑英華卷第六百三十一

謝恩四

狀四

壽昌節謝酒食狀一首 嘉會節宰相謝酒食狀一首

中和節謝賜尺狀一首 清明謝賜尺狀一首

為人端午謝賜物等狀四首

社日謝賜羊酒海味及茶等狀一首

重九謝賜餠酒等狀一首

臘日謝賜物狀八首

壽昌節謝酒食 集作茶酒狀 宣宗生日

杜牧

右臣某等言伏以大慶吉辰榮霑錫宴鴻恩繼至王人荐
臨旨酒名肴 集作茶 玉食仙果來於御府莫匪天慈適口忘
憂已滿小人之腹殺身粉骨難酬聖主之恩臣無任感恩
抃躍之至

嘉會節宰相謝酒食狀 昭宗生日 錢珣

右伏以香火至誠祝後天於萬歲弦匏飾喜會率土於三
春敢望宸衷恩隆輔弼王人遞遞 一作隆 降寵錫爰加酒醕既陳
炮燔兼至名茶馥郁嘉果駢羅嘗珍而食指先驚敢忘盈
滿竊位而憂心已醉寧待獻酬仰望眷慈臣某等無任兢
感懽抃屏營之至

中和節謝賜尺狀 白居易

右今日奉宣賜臣等前件紅牙銀寸尺各一著伏以中和
戒 集作福 節慶賜申恩當晝夜平分之時頒度量合同之令
況以紅牙為尺白金 集作銀 為寸美而有度煥以相宣逮下明
忖度之心為上表裁成之德慶澤所及歡心畢同臣等塵
忝日深寵錫歲至雖恩光下濟咫尺之顏不違而尸素內
慙分寸之功未効捧受愧畏倍萬恒情謹具奏聞謹奏



清明謝賜火狀

前人

右今日高品官唐國玠就宅宣旨賜臣新火者伏以節遇藏煙時當改火助和氣以發滯表皇明而燭幽臣顧以賤微荷茲榮耀就賜而照臨第宅聚觀而光動里閭降實自天非因榆柳之燧仰之如日空傾葵藿之心徒奉恩輝豈勝欣載

為人謝端午賜物等狀

令狐楚

右中使王進卿至伏奉詔書慰問臣兼宣恩旨賜臣及諸將衣并百索銀器等者臣伏以夏之為仁寔由乎長養王者所寶莫重於賢能故事將錫長年皆於今月因頒玠翫遐及庶方誠上帝之殊私信大朝之盛典臣才無所取政不足稱獲守司存已為尸忝豈意九天之慶賜每歲必來五日之祥期一作祺祥無年不受衣裳霧疊詔書墨繁篋中盈綵絲之索按上滿貞金之器方圓通用紅紫交光命輕而服拜難勝身賤而鋪塵不稱以榮為懼當喜而憂終無補於成功空有慙於僭賞並準勅捧受兼分給諸將訖所守有限不獲陳謝

為安平公謝端午賜物狀

李商隱

右今月某日中使其至奉宣恩旨賜臣手詔一通兼前件端午紫衣銀器百索并大將衣者乾文昭融著賜稠疊恩生望外榮積懼中臣已當時宣布給散訖伏以正陽令月端午佳辰溼澤合止於勲賢錫賚宜先於戚屬臣遠臨東魯久去上京豈望仁時同躋壽域八行明詔伏讀而不啻千鈞一蘖輕衣跪捧而若無三伏况又綵縷出仙蠶之蠶貞金凝姪女之鬼持可戒盈帶堪延筭豈微臣獨忝在列校不遺華楚成行永願千春而奉聖綿長共保常期五日

以霽沾恩臣與大將等無任感激懇悃之至

為滎陽公端午謝賜物狀

前人

右中使某至奉宣恩旨賜臣端午紫衣一副百索一軸銀器二事大將衣三副并賜臣手詔一通者伏以五神定位祝融司長養之功六律鈞和蕤賓有酬酢之義故節推戴禮日著漢儀彼艾人遠具於歲時角黍近標於風土乃耆舊傳聞之末亦集作君親慶賜之原伏惟皇帝陛下克協樂章允符時訓恩集作霽近戚惠浹元僚臣守介蠻圻程遙鳳闕敢希瘴嶠特降軋文輕縞染衣貞金備器海綃掩麗渠盃藏玳拜受若驚跪捧如失嘗衣國僑之紵被服多慙久携顏氏之瓢捧持未慣當晝而不假交扇向夕而唯宜飲冰況又將以綵絲縈諸畫軸用禳故烝蕪續脩齡爰自微臣頗流諸校鞠躬被寵全踰錫帶之榮覩物傳輝實動請纓之思唯當仰承帝力粗舉藩條誓相率於明時庶同登於壽域臣與大將等無任望闕感恩抃舞屏營之至

謝賜端午衣物狀

張次宗

右伏以中暑良時沐蘭令節王人乘駟初降於九霄內府頒衣遽霑於千里臣忝膺寄任未展涓埃節候每移尸曠增懼陛下殊私荐及寵賜不忘天書觀經緯之文麗服見裁縫之妙捧其玳玩價重於兼金賜以綵絲恩深於延筭况寵周將校問及偏裨爭馳就日之誠益勵酬恩之節

社日謝賜羊酒海味及茶等狀

常袞

右中使某至伏蒙聖慈賜前件羊酒等臣謬塵重任已積歲時日有餐錢月受高俸過蒙溫飫常愧有餘內省謀猷實慙不足益彰尸忝深誠滿盈屬上戊御辰勞農報社賜

兼海陸品極珍鮮上減御殮一作養下豐私室何功而受承寵
若驚惶恐拜恩戰懼交集無任戴荷欣抃之至

重九謝賜餠酒等狀

前人

右中使劉君壽等至伏奉恩命賜臣前件餠酒等仍令樂
飲者伏以亥月戒時清風應律宜於長久欣聖祚之壽昌
復見芳華喜陽數之重合時恩忽降節賜荐加王人寵臨
御膳分旨膏以粉餌蒸以饴餠綠芋金芽紫蔗筠節茱萸清
酒嘗聞舊俗之傳蕙苾調賜今覩靈珍之味此一獲人苑
吏上獻嘉辰豈伊凡品微生下露殊貺賜宴既聯於伯仲
覃恩更及於室家稠疊寵光低迴殞越一門同慶萬死何酬

臘日謝賜口脂曆日一狀

鄭綰

伏以王人戾止天書遠降於閩川星躔既回莫曆猥頒於
遐服推步允符於聖祚先天克合於歲功三百六旬斯須
而咸覩二十四氣瞬息而可知一作回又賜以蘭膏錫之絳雪
衆香流澤芳潤忽光於悴容五藥蠲痼瘴藹潛銷於腠理
仰榮知忝承寵益驚闔闔九門歲時結戀於雙闕方隅萬
里展効期激於丹誠敷惠未洽於遠人拜賜濫同於重鎮
觀風察俗志有立於消塵比物省躬恩何酬於覆載臣某
不勝歡躍屏營之至

爲昭義李相公謝賜臘日口脂狀 崔行先

右中使某至伏奉勅書墨詔緣大禮後慰問臣及將士官
吏等又緣近臘日便賜臣前件藥物臣謬履鈞衡守茲戎
鎮星霜屢改渥澤逾深內忭外慙不知所措文明啓運殷
薦告成郊廟展嚴禋之儀蒸藜洽時雍之化大宥五刑之
典廣霑萬物之恩自天有慶與人更始臣名器俱忝宸睟
曲臨節近嘉平恩延寵錫香膏凝潤於寶器上藥祕重於

仙方澤變衰顏不知老之將至光生儻質空驚疾乃有瘳
祇奉舊章式披新曆想天長而地久看日往而月來無任

臘日謝賜口脂紅雪等狀

前人

右中使某至伏奉手詔慰問臣及將士等又緣臘日賜臣
口脂紅雪并新曆日等伏以蜡節嘉辰載於六籍皇恩隆
洽賚及萬方金膏不祕於上清蘭澤遠傳於中禁加以玄
霜絳雪素能愈病疾一作析醒顧惟賤庸承此恩造隕越無
地惶悚失圖縱知死所豈答玄造載頌新曆永傳億萬斯
年欣奉明時獲辨七十二候無任云云

為王大夫謝恩賜口脂曆日狀

前人

右中使某至伏奉手詔慰拊臣及將士等又賜臘日口脂
并新曆日等伏以清祀嘉名載於前典實追歡之盛節亦
和樂之良辰況天休光臨聖慈遐布顧臣賤陋竊奉明恩
感戴周全不知所措蠲邪愈疾驗絳雪於仙方却老駐顏
觀瓊膏於寶器式頌聖曆仰贊皇猷永為四海之尊更續
千齡之壽臣不勝歡躍云云

為人謝賜口脂等并曆日狀

令狐楚

右中使吳千金至伏奉勅書慰問臣并賜前件口脂臘脂
紅雪紫雪各一合并曆日一卷等者伏以歲將更始節及
嘉平陛下凝香為膏聚藥成散頌日月於曆上奮龍鸞於
筆端星分九天之使雲布一日之澤此誠無私之殊造均
養之深仁而臣空抱愚忠曾無方略一居藩鎮三度受恩
朱奩忽開鮮膩與芳馨相雜素編既列閏餘將分至不差
披尋而齒筭延長塗傳而口容芳潤油雲之覆逾廣無以
勝任綿地之封粗安未為報効捧受嘗翫形神渙然無任
感戴之至

謝賜臘日口脂紅雪紫雪曆日等狀 前人

右中使董文萼至伏奉詔書慰問臣并宣恩旨賜臣前件物等者臣伏以天書垂露御曆頒年靈膏有瓊液之容仙散擬雪花之狀司天推步定分至於四時尚藥煎和辨君臣於百品無不關於睿想發自宸衷錫勳烈之臣猶无獨不過分幸霑庸微之質實所難勝况之潤身之資欣蒙苦口之利謹當奉揚節候下告于萬人宣播光輝旁誇於九族殊私未答渥澤逾深夙夜寢興不任感戴

為人謝賜男歲節料并口脂臘脂等狀 前人

右臣得男公敏狀稱伏奉恩旨賜歲節料麵兩石羊壹腔酒伍斗口脂臘脂紅雪各一合者臣繆以庸虛叨塵膺任使陛下前因蜡日已降使臣既霑澤口之膏又賜雪煩之散一從捧受實未遑寧豈疲病小男復蒙寵賜錫一作酒漿

漿口腹充溢於盃盤藥餌脂膏馨香于懷袖雖君父用賞延之義微細不遺而臣子非立功之人光輝斯極豈德澤之私於一物俾恩波之重若三山夙夜寢興以榮為懼戎守有限不獲陳謝無任感慶屏營之至

臘日謝賜口脂集作狀

白居易

右今日蒙恩賜臣前件口脂集作狀及紅雪澡豆等仍以時寒特加慰問者伏以時逢臘節候屬祁寒豈意聖慈不忘微賤念嚴凝而加之煦嫗慮皸瘃而潤以脂膏集作喜氣動中歡容發外挾續之恩甫及集作所勉和則體舒不龜之澤既霑感而手舞臣等省躬懷愧因物喻情豈止飲德瑩心集作唯驚寵賜必擬澡身勵節以答鴻私感躍之誠倍萬恒品謹具奏聞謹奏

文苑英華卷第六百三十一

登仕郎胡柯

鄉貢進士彭叔夏校正

謝恩五

謝出餞宴狀一首

謝賜設狀四首

謝賜宴狀二首

謝賜食狀三首

謝賜酒脯等狀一首

謝賜人糧馬料狀一首

謝賜米麵狀一首

謝賜大麥麵狀一首

謝賜鹿狀二首

謝賜魚狀一首

謝賜蟹狀一首

謝賜車螯蛤蜊等狀二首

謝賜甘子狀一首

謝賜甘蔗芋等狀一首

謝賜茶果狀一首

謝恩命遣高將軍出餞狀

李邕

右高力士奉宣口勅以臣臨政特令賜宴恭承惠渥伏念庸微天地周仁木石知感不勝惶悚戴荷之極臣死罪死罪臣歷觀自古君臣凡所際會或因緣黨進或收接功成故未謁而知不言而信豈有地孤援寡毀衆謗深察蒙蔽之中致昭曠之外逢陛下特達之遇當陛下明聖之朝事出常均恩重今昔臣誓將瀝血足可竭誠徒欲殺身豈能報德至如勵精勤政舉直徇公副陛下憂人之心行陛下弘道之化豈敢失墜以負神明但函關路懸長安日遠不任戀主悽悽之至

謝賜設狀

白居易

右今日守謙奉宣聖旨以臣初入院特賜設者臣生長窮賤才質孱微草野鄙夫風塵走吏豈期聖造擢在禁闈煦以天慈賜之豐食集作賜以御食臣所以凌兢受命俯伏荷恩心魂不寧手足無措況罇開九醞筵集作饌列八珍惠過加籩榮優置醴金壘引滿將皇澤而共深玉饌屬厭與聖德

而俱飽終食且歎捫心自驚戰汗慙惶隕越于下謹奉狀
陳謝以聞謹奏

謝賜設及疋帛狀

前人

右今日高品劉全節奉宣進止集作以臣等在院覆策畢
特加慰問并賜設及疋帛者臣等職在掌文詔令考策雖
竭鄙昧猶懼闕遺豈意皇鑒下臨聖慈曲至惠加賜食榮
及承筐寵厚縑緗仰難勝於玄貺恩深醉飽退有愧於素
飡徒積慙惶何酬慶賜無任感戴屏營之至

謝賜設狀

元稹

右今日某乙奉宣恩旨賜臣就院設者臣聞推食之賜用
勸勲勞置醴之恩以待賢彥微臣猥承天眷擢在集作內
庭雨露頻施涓埃莫効陛下載分美祿特降珍羞空懷滿
腹之慙未有沃心之便既充膚革誓竭肺肝竊位素飡實
非誠願微臣無任感激恩私之至

為中丞榮陽公赴桂州長樂驛謝勅設狀 李商隱

右今日日中使某奉宣進止集作就長樂驛賜臣及將吏
等設饌者將承闔集作藩寄尚忝朝恩絡驛八珍芬芳九醞
臣階緣薄伎塵辱脩塗揚執戟之讀書雖無非聖董太中
之對策何補清時忽委廉車乍離閨籍誠欣列土實耿辭
天然猶食指告祥朶頤有慶爰於近驛式降貴臣酒自堯
罇饌分禹膳集作殷鼎下霑將校旁耀路岐況臣平生本實孤
賤懷書奉役久無黔突之謀入國展儀且惜殺蒸之禮飽
期滿腹醉更憂心終虞負乘之災無報雲天之施臣與將
吏等無任望闕感恩結戀屏營之至

九月九日謝恩賜曲江宴會狀

白居易

右今日伏奉進止

集作

賜臣等於曲江宴會特加宣慰并

賜酒脯等者伏以重陽令節大有豐年錫宴於無事之朝
追歡於最勝之地況天厨酒脯御府管絃寵賜忽降於寰
中慶幸實生於望外仍加慰諭曲被輝華臣等各以凡才
同參密職幸偶休明之日多承飫賜之恩樂感形骸歡容
動而成舞榮集作澤均草木秋色變以為春徒激丹心豈報
玄澤謹奉狀陳謝以聞謹奏

三月三日謝恩賜曲江宴樂狀 前人

右今日伏奉聖恩賜臣等於曲江宴樂并賜茶果者伏以
暮春良月元巳嘉辰巳集作獲侍宴於內庭又賜歡於曲水
蹈舞跼地懽呼動天況妓樂選於內坊茶果出於中庫榮
降天上寵驚人間臣等謬列近司猥承殊渥集作澤捧觴知
感終宴懷慙肉食無謀未展涓埃之効素飡有愧難勝醉
飽之恩以此兢惶未知所報謹奉狀陳謝以聞謹奏

謝賜食狀

張九齡

右臣等面奉進止令就集賢院與諸學士等觀聖注道德
經尋又賜臣等食竊味道腴兼承珍饌聞義飽德虛往實
歸臣等何人叨承渥澤不勝惶悚感戴之至

謝每日賜食狀

常袞

臣袞言臣聞恩或曲存義不虛受故耆儒碩德方載珍羞
大節殊勳乃加禮食至於列曹分署各置食錢匪頒王褒
食有公膳陛下勵精庶政垂意輔臣特降非常之慈
屢蒙每日之賜上林果實至必先時太官殮牢送無曠日
臣等自登三事已涉七旬當朝廷釐革之時佐海內安危
之重入趨殿省常奉憂人之旨出在廟堂每思克己之効
而不能陳一策進一賢外無平戎之謀內闕叙官之實四
夷未格百姓未安不副憂勤合當罪累更承飫賜實用慙

惶既招折足之嫌將貽騰周賜口之誚伏望重回宸睭載
允誠詞俯停三錫之恩伏免萬方之責則神明或祐官謗
不行在於微臣再受多福無任懇迫悚懼之至

代杜相公謝就宅賜食狀

劉禹錫

右高品某乙奉宣聖旨賜臣食者出自太官飫于私第光
榮曲被猥承推食之恩驚蹇未施益重素飡之責舉其七
筋若負丘山無任戰荷踴躍之至

為宰相謝恩賜酒脯餅果等狀 白居易

右中使某奉宣聖旨賜臣等前件酒脯二字集等俯俸受
賜竦躍荷恩天酒來以分甘御餽集作降而示惠臣等省
躬知感因物言情寵過加籩懼多尸素之責榮同置醴慙
無麴蘖之功徒瀝丹誠豈酬立造

代謝賜人糧馬料狀

此是讓狀英華誤編于此

于邵

右臣先奉恩旨賜前件人糧馬料初已陳讓不蒙允許臣
昨日於延英對見又請前件糧數內停一千人糧聖情未
察倍增一作益惶懼臣自興兵已來早參戎律及討慶緒即從
先皇皆虔奉眷謀遂清多難豈臣薄劣輒敢貪天而寵遇
特深封賞殊厚纏綿渥澤三十餘年食邑累加俸料甚一作
廣自此之外更有田園朝夕所須幸無闕之不謂繼明之
始恩出非常曲賜褒崇露此糧斛雖雲雨之施在恩私而
至極被凋朽之質顧饗餐而多慙是以形神震駭不知所
據懼速顛沛以促餘年敢犯宸嚴重祈哀亮儻蒙全度伏
乞賜停謹奉狀 六六

謝米麵羊酒等狀

常袞

右中使某至奉宣恩命以至節恩賜米麵羊酒猪鹿及雜
口味等者聖旨頻降榮賚過優以周官百品之珍載頌其

實雖魏臣五金之貴豈容其多受賜踰涯拜恩失次臣出自孤賤素甘貧苦不過滿腹竊誠終身且祭不掩豆飯惟脫粟昔賢之美其儉可師敢望豐盈重彰尸曠而雨露偏施歲時益榮俾奉先之饗味兼海陸合族之宴及於膏粱又沐深慈下露中饋以感以慶啓處難任無德無功慙惶罔措不任戴荷兢惶之至

謝賜大麥麵狀

張九齡

右林招隱宣勅賜臣等招隱說云薦新之外禁中所出皆是降至尊親耕稼穡之所成也伏以周人之禮唯有籍田漢氏之薦但聞時果則未有如陛下嚴祗於宗廟勤儉於生人事必躬親動合天德臣亦何幸近奉德音又蒙聖恩猥垂珍錫已飽於聞義況露此時羞綢繆渥澤未知報効死罪死罪仍望宣牒史館以示將來臣等不勝感荷之至

謝賜鹿狀

常袞

右中使祁國俊奉宣恩旨以前件鹿稍覺鮮好特以賜臣者謬竊和羹之任累承分食之恩無補消塵叨一作露雨露上戴洪造內愧素飡伏以陛下順時令以宣風展春蒐之彝典有司奉職上苑從禽將備御庖獻茲鮮獸旨供六膳以副八珍臣實無功何以受賜寵承殊渥味則非時顧調飪而空慙荷生成而何答無任感恩悚抃之至

為晉公謝賜鹿肉狀

苑咸

右內品官史鳳節至奉宣聖旨賜臣鹿肉一盤捧戴殊私喜躍無地伏以十月農隙三秦歲成展豫離宮時巡近甸幸承扈蹕已荷陪遊之榮恩降自天更沐珍鮮之賜慶覃野次澤被私門顧螻蟻之至微仰丘山而何答無任感佩惶悚之極

為晉公謝賜魚狀

前人

右內品官葉惠仙至奉宣聖旨賜臣魴魚一盤仍便令造羹仗以九天之使頻過衡門八珍之羞屢霑御膳登盤既榮於薦熟正席更喜於先嘗每侍軒墀曾無獻替歸休私室偏沐恩波空荷紅鮮之慈實負素飡之責無任惶悚感戴之極

為晉公謝賜蟹狀

前人

右中使焦庭望奉宣恩旨賜臣生蟹一盤便令造食臣自叨陪侍從累沐殊榮朝天賜浴於御湯退食每霑於仙饌賞隨恩積慶逐時新臣之何功偏承厚錫游泳渥澤但懼踰涯徘徊寵私無階答効無任望外荷戴之極

為晉公謝賜車螯蛤蜊等狀二首

前人

右品官葉惠仙至奉宣聖旨賜臣車螯蛤蜊等仍令便造膳

適中使

賜臣水犢肉一合

自濫陪巡幸累沐殊私每

荷沐

一作

天恩曾不踰日或承海味或降珍鮮況皆聖主傳

方王人調飪薄効無裨於涓滴厚施轉積於丘山昔周美康侯特霑蕃庶之錫漢宗張禹亟覃賜饌之榮才不逮於前賢而遇每深於曩眷雖竭心盡節何答生成不任云云

二

右內官趙承暉至奉宣聖旨賜臣車螯蛤蜊等一盤仍令便造趙承忠至又賜生蟹一盤高如瓊至又賜白魚兩箇伏以衡門之下頻降王人簞食之中累承天饌適口之異無時不霑駭目之珍每日幸一作皆遇顧循涯分何以克當徘徊寵私罔知攸答

謝恩賜甘子狀

于邵

右中使某乙至奉宣進止賜臣前件甘子伏以江澧所出

見重於南州苞茅入貢一作菁遠歸於北闕陛下念其野

次錫及微臣顧萍實以虛言非蔗漿之足擬分甘絕少司馬

遷傳李陵絕甘分竊荷於恩私食堪懷音敢忘於報効無任

謝賜甘蔗芋等狀

常袞

右今日日喬甘至奉宣恩命賜苑中所種甘蔗及芋等其
形豐其味甘曲被生成之恩宛同吳蜀之物過蒙頒錫伏
用驚喜陛下以萬靈效祉六合同風養之則生孰云其遠
化之自我不隔華夷將有絕域之人服中州而稟教故使
他邦之產歸上苑而咸植既登天膳實表地成太和之理
於斯可見捧承異貺兢跼素飡感戴之誠倍百疇品不任
受恩悚懼之至

謝賜茶果等狀

白居易

右今日高品杜文清奉宣進止集作以臣等在院修撰制

問賜茶脯梨果者集作茶果曲蒙聖念特降殊私慰諭未

終錫賚旋及臣等慙深曠職寵倍驚心述清問以修辭言

非盡意仰皇慈而受賜力豈勝恩徒激丹誠集作酬玄

造無任欣戴抃躍之至

文苑英華卷第六百三十二

登仕郎胡 柯 鄉貢進士彭 叔夏校正

謝恩六

謝賜衣服狀五首

謝賜春衣狀六首

謝賜冬衣狀八首

謝賜馬狀八首

謝賀集作侍講遍賜衣物狀

張九齡

右高力士至宣稱陛下親講讀毛詩遍賜侍講陳希烈三品兼賜衣物等伏以睿思玄通超然物表俯臨天下必樹風化既弘儒教考覈詩人爰託師資親行講讀章句初畢賞賜錫集作有加明主深恩集作誰集作孰集作不知勸臣謬承任遇實愧經通聖業彌深微誠何補方思敷學以助皇明集作明時無任悅豫之至

謝賜衣服及綰狀

前人

右中使其至特蒙恩曲賜遠別之什又中使其宣口勅賜衣一副并綰一百疋者但柱礎雖下感致於青雲陽燧則微昭應於白日在臣孤賤亦荷寵光伏惟陛下御札龍躍八體比之未雄天文鳳章五色對之猶淺況東帛荐至衣服仍臻施重丘山恩深江海實為九族遍有光華匪唯賤陋獨稱榮慶不任云云

謝賜衣物狀

前人

右高力士宣勅賜臣衣及器物等臣九齡不孝苟存企及禮制天恩以忝樞近賜問再臨衣服珍器殊常寵錫臣有何力可以叨濫渥澤至深誠効已竭唯有微命不知所圖無任感戴惶悚之至

為盧監被盜衣物謝賜御衣物狀

蘇頌

內常侍趙元亨奉宣恩旨以臣被竊盜失物賜臣衣一副臣素以慢藏闕於周備令尹為過尚不可逃太丘有言復

不能覺使臣知政未息盜於荇蒲加臣匪服遂增輝於櫛
櫛顧深憊各翻荷恩慈捧戴循環再三惶懼無任下情之至

謝恩賜衣服狀

白居易

右今日守謙奉宣聖旨以臣初入院特賜衣服者臣自入
禁司纔經旬月未申陳集作薄効累受殊私況前件衣服等
獻自遠方降從御府既鮮華而駭目亦輕煖而使身臣實
何人堪此榮賜必擬秘藏篋笥傳示子孫何則顧陋質而
懷慙貌非稱服撫微軀而荷寵力不勝衣因物感恩無任
愧懼謹奉狀

謝恩賜春衣狀二首

崔行先

右中使至伏奉勅書手詔宣慰臣及將士等兼賜臣春衣
等鴻恩霈澤忽降轅門霧縠冰紉猥加介冑臣等謬膺委
使徒展寸誠曾無逐獸之功每懼伐檀之刺捧受祗慄不
知所裁仰戴恩光將何上答彌憂不稱其服益用內愧於
心無任云云

二

右中使至伏奉勅書手詔宣慰臣及將吏等又賜前件春
衣臣等駑駘賤品介冑匹夫未彰塵露之功洵及雲雷之
澤喜抃兢惕恍然失圖捧戴恩私不知所據以御府紈素
耀晴景於三春天宮蘭麝襲迴風於十步豈土木之質被
服所宜雖灰粉其身上答何極無任云云

同前

于邵

右今日中使至伏奉勅書手詔慰諭臣及三軍等并賜
臣及大將春衣者捧戴抃躍實增慙懼臣功效微淺寵遇
日深霜露適濡恩已承於挾纊清明才度賜又及於解衣
仰服用於公家罷裁縫於私室及已頒分大將訖各盡殫

戎之力用申報國之誠

同前

常袞

右今月五日監軍某乙左行營十將其官某乙送正月十二日書詔并賜臣衣三副軍將二人衣兩副跪伏捧承惶悚殞越臣素以愚懦昧於吏能虛受寵私豈堪任使謬承條察吏法非明忝司訓練戎行不肅今之曠職獨有微臣宜懲冒榮以勵分鎮豈謂特迴聖睠俯示天書曲降宸慈載加墨詔下頒春服遠被時恩獎飾逾涯兢惶失次載光師旅仍錫偏裨誓以捐軀期於上報無任慶抃悚踴之至

謝賜春衣牙尺狀二首

爲人作

令狐楚

右中使至伏奉詔書宣賜前件物臣伏以衣服者身之文章尺寸者王之律度被於四體不衷則災考以二分無差爲貴伏惟皇帝陛下陶蒸萬類軌物非人每及新春皆頒上賞其或才堪國用智代天工福至而驚名成猶懼循省涯分比數藝能臣實無任累承斯寵曳紫光於腰下稱佩黃金操素質於掌中如持白璧窺看耀日舉止生風誠聖主全覆育之仁顧微臣無秉持之力蒙恩過厚忽愧逾深終申一寸之功用答九重之賜欣榮感惕不自任勝

二

右中使駱元榮至伏奉勅書手詔慰問臣等并賜臣春衣二副牙尺一枝軍將衣二十副者臣伏以行慶于下惟德所廣受賞于上無功則難臣實何人叨居重任履冰非懼食璧爲甘今者伏蒙陛下推漢后解衣之恩寵錫春服稽有虞審度之典榮頒象尺樂官考正無累忝之差女御裁縫有奪朱之麗而況端平皎絜無慙七寶輕盈綵繡不謝六銖此臣所以捧觀而似覩鈞衡服拜而如生羽翼謹便

分散諸將傳示衆人感戴欣抃歡與臣同一作感戴欣抃所守有限不獲拜謝無任欣躍一作抃之至

謝賜冬衣表

權德輿

此表移在五百九十三卷表門今存其目

謝賜冬衣狀三首爲人作

令狐楚

右中使宋文瓌至伏奉勅書手詔慰問臣及將士等并宣恩旨賜臣等前件冬衣者臣伏以爪牙之寄才實甚難衣裳之賜恩爲至厚臣之器質無所任用誠不足以膺重寄而蒙厚恩今陛下陶以大和蓋其多闕及戒寒之日屬授衣之時喻一作倫比賢能頌宣慈惠跪聽清問欽承寵章宛是蠶綿爛如獸錦長皆被土貴實兼金分列校不辨鮮華在微臣最爲重疊自承天澤不憚風威仰戴恩光有千鈞之重俯循功績無一縷之微空知竭誠難以勝德謹並捧受分給訖所守有限不獲陳謝無任感慶屏營之至

二

右中使某至伏奉勅書手詔慰問臣及將士兼宣恩旨賜臣等前件冬衣者伏以綸綍之言出於天澤衣裳之受必以王功臣職在惣戎任當平寇効無絲髮非聖主而豈容施若丘山在愚臣而將壓今者司寒肇至命服載新降自九霄來經千里錯鳥章於襟帶奮龍文於素牋兼并縟麗備極瓌竒木石之姿過蒙鮮飾冰霜之氣頓減嚴凝曳婁而賤質生光憤悱而懦心增勇終期薄効用答深恩謹準勅受兼分給諸將訖所守有限不獲陳謝無任感戴之至

三

右中使吳千金至伏奉勅書手詔慰問臣及將士等并宣

恩旨賜臣冬衣兩副及諸將衣二十副者臣守國之藩荷天之寵名聲績用未有可稱伏惟皇帝陛下仁育庶方澤均羣動當玄律開冬之候念祁寒用事之初書詔交飛衣裘疊至墨盡龍蛇之妙綾兼龜鶴之奇服翫而衰殘有光拊循而孱懦增氣自臣而下萬口一聲臣並準勅分配訖不勝歡抃愧戀之至

為滎陽公謝賜冬衣狀

李商隱

右中使某至奉宣恩旨賜臣冬衣一副大將衣四副兼賜臣手詔一通者八行帝語宵降於重霄一襲天衣俯迴於窮節臣當時準詔給散訖臣叨蒙重寄適控遐陬地雖五鎮之衝氣得四時之正每玄冥應律顓頊司辰當二日之鑿冰則殊幽英華作幽野及兩楹之飛雪無異朔山重以賓布少溫蠻綿之暖方求麗密以禦嚴凝豈望司服頒衣貴臣傳詔綾裁飛鵠絮集作素衰仙蠶白分椒壁之光紫奪蘭牙之色已均下將仍逮連營晏子狐裘故弊何一作舊飾故彰於國儉王恭鶴氅風流不自於君恩被服有輝負戴無力謹當上宣殊渥下拊多寒均大裕於瑯琊變無襦於蜀郡粗令康泰以塞貪叨臣與大將等無任望闕感恩抃舞屏營之至

為濮陽公涇原謝冬衣狀

前人

右某月日中使某至奉宣聖旨賜臣及大將兼諸鎮防秋兵馬等前件勅書手詔并冬衣者臣並已準詔旨宣示給散訖恩極解衣榮加降壓戴山未重負日非暄臣謬領藩垣適當戎狄唯憑廟筭粗展集作振軍威絕漠集作塞獵迴幸無警急高烽火過但報平安直以地勢多陰川形稍背三伏常聞於屏筮九秋尋訝於垂繒代馬暫嘶隴山無葉燕

鴻未過涇水先冰是以每降王臣仍迂御筆緘封垂
露寵錫御冬非玉女裁成即仙人織出徒驚在筭莫匪集
因針始顧孱微深懼不勝冠帶旋蒙被服便如能執干戈
遍逮軍前歷霑麾下達喜氣而陳根復秀動歡聲而蟄戶
潛開華楚成行曳婁塞路其山南宣歙三道大將等雖久
居炎燠不慣嚴凝亦既更衣皆忘易地賈餘勇而例思盡
敵感鴻私而咸願殺身各限征行不獲陳謝臣與大將等
無任瞻天戀闕感恩屏營之至

謝賜冬衣狀二首

張次宗

右伏以玄律戒時祁寒應候王人傳詔御府頒衣伏惟皇
帝陛下盛德御天至仁育物每念藩方之任屢加寵錫之
恩臣績効未施塵忝茲又捧溫密之詔喜若朝天被輕纖
之衣暖同就日況撫寒之問下及師人錫服之榮遍周戎

校喜氣乍傳於封部陽和先及於荆衡爭馳戀闕之誠各
勵酬恩之志 云云

二

右中使劉泰伸至伏奉勅書手詔宣慰臣及將吏僧道百
姓等并賜臣手詔及冬衣兩副大將衣十副者清風戒寒
玄律將至未及嚴凝之候已霑輕暖之衣承寵命而載慙
啓緘封而增感伏惟皇帝陛下至德御時深仁育物光武
十行之詔每觀憂勤魏后五時之衣未為寵錫况臣叨榮
漸久受賜彌多寒暄之節候驟移新舊之光華相委被服
悉頒於御府裁縫僅度於私家挾纊之恩已周於列校維
鶉之刺尤媿於微躬無任

謝賜馬狀

張九齡

右今日高力士奉宣聖旨賜臣紫騮馬一疋伏以恩覃不

次寵遇非常有忝股肱之臣頻奉渥注之賜況郊壇展禮
尚未奠於九宮而雨露深恩反有叨於三接雖鳴珂噴玉
朝天永代於臣勞而任重才微久歲寧酬於聖造荷負無
力答効何階云云

謝借馬狀

孔殘

右中使至奉宣進止將前件馬送臣至京北路界祇承寵
光載兢載惕微臣猥以庸瑣謬分憂寄拜命之日已受錫
於龍媒遵路之時復假榮於天驥恩私稠疊渥澤殊常豈
謂聖意不遺獨懷軫念輟驂騶於內廐■逸步於長衢驅
馳忘勞服習如志誓當夙駕奔走所部冀安夷獠以免聖
憂無任感恩懇款之至

謝借飛龍馬二疋狀

鄭細

右中使某至奉勅旨借臣前件馬至京北府界者王人在
門天驥臨路寵光荐及行色增輝上感恩私何階答効自
臣叨承戎寄累軫皇慈念輸力於外藩降逸材於內廐分
憂未酬於聖主代勞已及於微臣雖駑鈍莫施而疲羸頓
解再馳猶勤於遠道三接已及於帝畿即以某日至京北
府界迴瞻魏闕目斷白雲祇事王程指期丹徼無任感戀
之至

謝借馬狀

于邵

右今日中使某至以臣朝奏闕庭特借前件馬拜受殊深
不任驚懼伏以詔傳中貴馬出內閑恩光自降於九重前疑作
飾不關於衆口無功無效以懼以慙遂躡權竒方遺款段
瞻天心喜已馳捧日之誠向闕身輕更遇奔星之足仰丘
山而轉重知報効以何階

謝賜馬狀

常袞

右中使其奉宣恩旨賜臣前件馬臣竊位台司已招官謗未申薄效遽沐殊私捧荷驚惶心魂震越上慚慈矐下愧周行素無遠致疑作致遠之資負益懼負乘之咎無任感戴之至

為趙相公謝馬狀

齊映

中使其至奉宣進止賜臣馬一疋并鞍轡者臣官叨上司日荷厚俸固其乘馬足展驅馳宸矐過深聖慈猶軫猥出上駟特賚微臣豈徒體合鑄金法相皆備而乃足符歷塊驥德仍束以銀鞍絡以金勒顧自微賤何可服乘拜命兢惶不勝戰汗當攬轡之際思六合於如琴執鞭之辰度三代之得策空懷夙夜寧效消塵無任感激之至

為段相公謝借飛龍馬狀

白居易

伏以出從內廐行及中途假飛龍之駿駒代跛鼈之蹇步執鞭拜命借馬喻身取其戀主之心以表為臣之節恩深易感情懇難陳竦踴之誠倍百羣品

為中丞滎陽公謝借飛龍馬送至府界狀 李商隱

右中使其奉宣恩旨以臣赴任特借飛龍馬一集作兩疋并鞭轡等送至京兆府界者臣謬奉恩榮出叨廉問豈期蹇步深軫皇慈特命內臣俾騰上駟梁懸蜀鎗几覆吳鞍每多曳練之疑不假着鞭之力倏踰秦甸將復周閑照地迴光瞻天送影長亭欲別末期東道而來雙關儻嘶願附北風之思無任感恩戀闕雪涕屏營之至

文苑英華卷第六百三十三

登仕郎胡

柯

鄉貢進士彭

叔夏

校正

謝恩七

謝賜宅狀二首

謝賜內園花藥狀一首

謝賜冰狀一首

謝賜弓箭狀一首

謝為宰相賜吐蕃信物狀一首

讓勅賜蕃口狀一首

謝賜毯價絹狀一首

謝賜尺詩狀一首

謝賜撰鄭夫人碑羅絹狀一首

謝宣行哀冊文狀一首

謝令撰田弘正碑文狀一首

謝許受韋丹送撰碑綵絹狀一首

集賢謝示道經狀一首

謝御書大通禪師碑額狀一首

謝賜寺額狀三首

為五臺僧謝賜袈裟狀二首

為薛岌謝賜宅狀

于邵

右件宅先賜臣二弟嵩比緣空閑臣遂權住某月日中使

某至奉宣進止轉以賜臣并勅所司改給公驗臣素空行

藝久遭扞脇疑作汗脅陛下特存要領更齒班榮以非常之恩

以超等之賜自典環列職在警巡歲月徒深消塵罕錄豈

謂叨承後命曲被殊私錫以廕麻之地永為子孫之業生

輕施重內省知慙捐軀報德實臣志願無任感戴

代謝賜永崇宅并賜酒食錦綵器物等狀 前人

右今日中使某至伏奉恩旨令臣移入所賜宅并賜前仕

者慈旨曲降驚抃難容臣以微生幸逢休運上公政本既

荷殊私理第頒田特超恒數且居爽塏又賜歡娛芳膳出

於天厨喜疑作嘉賓傾於朝彥金石諧座珍竒爛庭況棟宇

輪囷近加朽填林塘秘邃潛蓄清涼素以衡茅特驚弘敞

周履既增於菟悸眄殊覺於心慙臣實何人遘茲多幸

飲恩知愧受賜輕生誓將灰粉百身償國家之恩遇拂磨

一劔弭一作殄兇醜於邊疆區區寸誠仰答萬一不任戴荷之至

謝內園果栽并令府縣供花藥狀疑是代郭子儀作前人

右臣得男曜狀稱伏奉進止緣臣莊栽蒔賜內園果樹又令府縣與竹及桐栽花藥等今月十日仍令開府魚朝恩已下到莊檢校者謬承天眷累沐恩私事有至微亦關聖慮顧唯別業封植未成特降明命賜臣甘木移根上苑擢秀中園發輝池館之勝實荷生成之力侍臣中貴接武負來墟落生光里閭增慶況內園所賜品類已多府縣更供竊憂煩擾在臣諸已先有不敢重此勞人望停府縣所供曲遂微臣至願無任云云

謝賜冰狀

白居易

右今日奉宣聖旨賜臣等冰者伏以頒冰之儀朝廷盛典以其非常之物用表特異之恩況春羔之薦時始因風出當夏蟲之疑日忽自天來煩暑迎銷清集作涼颺隨至受此殊賜臣何以堪欣駭慙惶若無所措但飲之慄慄常傾受命之心捧之兢兢永懷履薄之戒以斯惕厲用答皇恩集作慈謹奉狀陳謝以聞

代人作昭應獵謝賜弓箭狀

于邵

右中使某至伏蒙賜前件弓箭跪捧殊私抃躍無地伏以彤弓出轅利鏃離房月滿星流皆承御物摧剛服猛便假天威慙無矯控之能庶盡追擒之狀無任云云

為宰臣謝恩賜吐蕃信物銀器錦綵等狀 白居易

右臣等材愧庸虛職叨輔弼遇天下削平之日當西戎即叙之時遂使殊方致茲遠物此皆率由玄化感慕皇風人臣既絕外交問遺敢為集作言已有今蒙重賜益荷聖慈况

來自外夷知德廣之所及降從中旨仰恩深而不勝感戴
悚惶倍萬恒品

讓勅賜蕃口狀

此是讓狀英華誤編于此

張九齡

右高力士宣聖恩賜臣等蕃口執訊自邊釋囚為隸誠宜
供國次及賞功臣等無庸以何集作何受賜殊恩俯逮集作降
循涯自失伏望俯停渥澤存以至公矜遂懇誠許歸官寺
則上有無偏之道下無苟得之責無任悃款之至

謝賜毯價絹狀

令狐楚

右監軍使李輔光廻奉宣恩旨賜臣前件絹者臣當道比
年未豐經費不足懼乏供億慙無智能陛下散燭幽之光
垂逮下之德絲綸既出縑帛負來數至累千價盈巨萬廣
狹中量鮮明如水足以贍三軍之賜予充百工之餼廩捧
受欣抃不知所裁無任去去

謝賜尺詩狀

張九齡

右今日高力士宣勅賜臣等御製詩并寶尺伏以尺者紀
度之數宜麗天文詩者律呂之和是生節物聖恩下逮天
旨旁流因物寓言以言垂象臣雖瞽陋伏見宸衷竊謝良
工徒秉刀尺終期死力取配鈞衡而未副所圖退省知罪
臣等不勝負荷感懼之至

謝賜撰鄭國夫人碑羅絹狀

張說

右內侍尹鳳祥宣口勅得所進闐羊表及鄭國夫人
碑今賜卿綵羅二十疋絹一千疋闐羊薄伎恩感戰士之
心雕蟲陋詞媿稱賢母之德効輕賞重戴厚慙深臣子之
情豈望天報

謝宣行哀冊文狀

令狐楚

右臣先準勅撰成封進訖奉某月日勅旨敬依典禮不任

號慕者伏以範天地之大者難為狀鑄金石之堅者難為
工況先皇之武烈文明迥超前古而微臣之瞽言懵學不
及中人顧惟庸虛謬獲紀述叨蒙恩獎特賜宣行竊文士
之名誠有慙色彰聖人之德實荷經綸云云

謝準朱書撰田弘正碑文狀

元稹

魏博節度使李愬請與田弘正立德政碑

右臣伏準

集作奉

今月二十四日勅令臣撰前件碑文者伏以田弘正首變
魏俗彰先帝之睿謀近入鎮州宣陛下之神武積成忠懇
大有勲勞人懷去思願刻金石陛下所宜外詔台席內委
翰林妙選雄文式揚丕績豈謂天光曲照御札特書猥付
微臣實非常例且臣頃以特恩拔擢便欲効死仰酬遂竭
愚誠累蒙召對自去年九月已後橫遭謗毀無由集作再
覩天顏分隨枯朽而凋永絕恩波之望豈料聖慈長在記
憶姓名無人奏請撰碑便自宸衷宣付微臣忝非木石粗
有肺腸集作肝空懷感激集作漉之心未獲殺身之所無任感
恩思報鏤骨髓肌之至云云

謝許受江西送撰韋丹碑綵絹等狀

杜牧

右今月十六日集作八日中使某至奉宣聖旨令臣領受江西觀
察使紇于泉所寄撰韋丹遺愛碑文人事綵絹共三百疋
恩隨幸至榮與利并抃躍慙惶罔知所措伏惟皇帝陛下
皇天縱聖赫日資明大獎功勞不計存歿舉韋丹江西之
績特令微臣撰碑墮淚之思豈慙羊枯黃絹之妙實媿蔡
邕今者更蒙恩私廣受綵帛捧戴兢惕無地容身不勝感
恩慙惶之至

集賢院謝示道經狀

張說

右臣伏見聖札金字八分寫道經兩卷以為惠文太子三

七追福天毫發彩宸翰騰暉色麗風雲光逾日月伏惟陛下孝悌之至通於神明俯念天倫用資幽贊當茲炎暑服此勤勞事絕古今感深名教臣忝司舊職載考前王未有親親之至楷隸之美如斯之備也足以作則貽範垂之無窮伏望宣付史館以光典策無任誠懇慚惶之至

謝御書大通禪師碑額狀

前人

右內侍丑鳳祥宣示御書大通禪師碑額六字畫起平雲點蹲芒玉戈矛攢倚鸞鶴交飛神功發於至想睿思成於玄德實謂天龍捧持虛空稱讚逝者如在薦福知歸臣栖志禪門撰碑靈塔幸遇聖情崇道仙書假貸刻星辰於嘉石爛日月於封立感極悲生恩深無荅臣無任望外殊澤之至

謝賜天寶寺額狀

釋嗣安

右臣會覺等言臣聞皇天以平分四時聖人以亭育萬物僧等何幸頓沐殊私但以王者封畿乃稱鄴社之邑諸侯近甸是惟艷鎬之濱頃者靈符發兆聖號輝煥百神慶荅萬國惟新不謂惠澤旁流降仙毫之瑞札宸慈下被賜天寶之嘉名普潤緇黃齊露寺觀而魚龍起伏來從日月之宮東帛交更賁金繩之界雙林戴色紺苑增榮臣等不勝抃躍之至

謝賜貞元寺額狀

崔行先

潞府羅城南面臣故使李抱真先用料錢修置山亭并改造立五龍神院等

右臣昨奏前件亭子及五龍院等伏望天恩賜額為寺於當府抽有道行僧二十七人住持修理為國崇福者伏奉勅旨免臣所奏賜額為貞元寺者特沐殊私俯遂愚懇採寶

曆之二字開浮域之一名演皇劫無窮之期示蒼生迴向之路莫大之福實在於斯且上黨古郡先皇舊藩星辰曾降於謳謠符瑞見存於圖諜昔爲盤石之地新作布金之園廣梵宇於城中資聖祚於天上闔境臣庶歡抃難勝臣忝列藩維戴荷何極

謝賜僧尼告身并華嚴院額狀

令狐楚

右中使王進御至奉宣恩旨賜前件僧尼告身并院額等臣伏以有爲功德莫大於化人無上菩提亦先於奉國臣以前因慶誕輒貢獻陳期降福于上天庶効祥於今古伏蒙陛下用至真之印轉不退之輪寵錫僧名榮頒院額仰窺金榜跪捧瑤緘龍翥四維鸞迴三點憑大悲之力便至道場承上聖之仁必成菩薩光生十地歡動一方荷天眼之昭一作照明願法身之清淨所守有限不獲陳謝無任欣戴之至

爲五臺山僧謝賜袈裟等狀二首

前人

右中使蘇明俊至奉宣恩旨賜臣巾襪香茶念珠袈裟等伏以推恩之義法雨露而必均受施之深一作心戴丘山而不墜伏惟皇帝陛下爲人心印得佛髻珠垂衣于空寂之門倒屣於清涼之境每因令月常降信臣輦珍妙於九天散芳馨于十地巾裁吳紵靡不輕盈帔袖齊紈無非麗密臣某等名非長者跡在凡夫旣結襪以經行又焚香而宴坐啜楚山之新茗煩惱頓除持越海之名珠聖賢可數而煎和百品周遍萬僧觀弈葉以重光知分畦而疊慶豈大雄慈悲之力盡上帝福德之田誓常潔已禱天虔誠報國以無疆爲聖壽以常樂爲昌期長承覆護之仁永助清平之理限以修習不獲匍匐陳謝無任感戴之至

同前

前人

右中使蘇明俊至奉宣聖旨賜前件袈裟蓮子念珠等物均散五臺山諸寺伏以稻畦可製降自九天蓮葯親規生於八水或光浮眼界或香滿鼻根豈意凡夫今蒙寵錫山積于樓臺之下無不裝嚴雲散于林嶺之中悉皆周遍咸承覆露孰不欣榮誓將傳印之功以助垂衣之慶謹並準勅分散訖無任感戴之至

文苑英華卷第六百三十四

登仕郎胡

柯

鄉貢進士彭

叔夏

校正

賀上

賀冊尊號狀二首

賀冊皇太子狀三首

賀降誕日德音狀一首

賀聖躬痊復狀二首

賀順宗謚議狀一首

賀論二教狀一首

賀西幸改期狀一首

賀冊尊號狀

孔戣

右臣聞唐德格天列聖垂裕必紀明黜以彰治譴功伏惟
元和聖文神武法天應道皇帝陛下續戎十聖時乘六龍
躬一德而善繼丕承聲有形而天覆地載既休武力方用
文經遺步驟於殷周振聲容於華夏既而天人合應億兆
叶心探至道於邦家之先揭鴻猷於強名之域陛下初違
羣議方守謙光旋體至公遽迴慈睠德意既降盛禮將陳
凡在品彙無任幸甚臣以待罪遐徼不獲稱慶闕庭徒勤
子牟江海之心有同太史滯留之日無任歡抃之至

賀冊尊號表

英華作狀非

韓愈

此篇當在五百六十九卷表門今已移入姑存其目

百寮賀冊皇太子表

英華作狀非

柳宗元

此篇當在五百十七卷表門今已移入姑存其目

為崔大夫賀冊皇太子狀

孔戣

臣聞帝王立極必建儲貳俾承宗祧所以祗奉烝盛永固
社稷者也伏惟睿聖文武皇帝陛下積德承業光有天下
思正國本以和人心載考春秋之義以明君臣之道主茲
上鬯允屬元良推明至公振舉舊典皇太子體仁秉哲既
嫡且賢溫文發中孝友聞外欽若不訓允膺冊禮陛下將
嗣十聖之休烈垂百代之懿範大備禮物廣設明庭陰氣

方晦而忽銷旭日既昇而增朗夷夏胥悅神祇克諧足以
包夏孕商跨周軼漢夫何晉魏以降易置瑣瑣不足侔比
盛禮既畢洪恩載洽恤刑議獄旌善賞勞禮問高年存恤
疾隱皇王之德於茲備矣臣忝列近侍親承眷謨抃蹈之
切不任愚懇云云

為鄭尚書賀冊皇太子狀

令狐楚

臣聞於宣政殿冊皇太子訖伏以建崇儲位光啓春闈萬
方以貞九服同慶伏惟皇帝陛下誕敷聖訓光啓天慈咸
元貞於國經鍾福慶於邦本皇太子溫恭表德仁孝因心
方毓質於龍樓肇增輝於望苑臣戎守有限不及蹈舞
稱賀云云

賀降誕日德音狀

元稹

右臣等伏奉今日勅旨集作書以降誕之辰奉迎皇太后宮
中上壽獲申歡慰宜集百寮及外命婦進名賀皇太后仍
御光順門內殿與百寮相見便永為常式者伏以降集作誕
聖嘉辰承天令節新恩肇降品彙咸休皇太后念樞星之
祥重遊甲觀羣執事排闥闔而入盡唱賡歌同沾就日之
榮實慶溥天之樂況百官集作寮承式萬歲傳呼永為利見
之規彌荷無窮之澤臣等謬參樞務親奉德音慶抃之誠
倍萬常品無任鼓舞歡呼之至

李令公賀聖躬痊復狀

前篇作表

于公異

平和前篇作康平上天前篇作自天坐朝前篇作求衣之事前篇作之任任
於藩臣前篇作彼戎臣其餘所司責成各有常務臣蒙國寵榮
輒露丹懇伏惟察納表臣愚忠無任感激屏營之至前篇
容聖心消息立化為宗社自愛委諸有司幸甚幸甚
甚臣蒙國寵榮輒露誠懇伏惟察納表臣愚衷

為大夫安平公華州進賀皇躬痊復物狀 李商隱

右臣聞藩方舊德臣子私懷將稱慶於天朝必展儀於土
貢伏惟皇帝陛下道苞乾象德惣坤靈肇自元正載康福
履九廟不忘於繼志兩宮無闕於問安鼓舞萬靈波傳四
國驗推測則咸知周卜聽祝詞而皆若華封臣坐擁伏熊
行驅畫隼值一人之有慶當春日之載陽心但葵傾跡猶
匏繫伏蒲之觀謁未果獻芹之誠懇空深況又地邇宸居
俗薰儉德更無玉帛以率梯航前件石器等瑞匪土硯珍
慙齷磬並取諸地產皆以勒工名苾苓伏神等品載仙經
竒標藥錄通靈祛疾不唯色若凝脂延壽安神豈是心如
枯木干冒陳進無任兢惶去云

賀順宗謚議表 英華作狀非

令狐楚

此篇當在五百七十一卷表門今已移入姑存其目

賀論三教狀

張九齡

右伏奉今日墨制召諸學士及道僧講論三教同異臣聞
好尚之論事蹟於偏集作萬方至極之宗理歸於一貫非夫
上聖孰探要旨伏惟陛下道契無為思該玄妙考六經之
同異筌三教之幽蹟將以降照羣疑集作敷化率土屏浮
詞於玉殿緝經集作精義於金門一變儒風再揚道要凡百
士庶集作庶罔不知歸臣等幸侍軒墀親承至訓抃躍之
極實倍恒情望宣付史館謹奉狀陳賀以聞

賀西幸改期狀

前人

右臣等今日面奉進止西幸有日般運已去仍聞京畿百
姓猶有未安儻來歲非熟下無所向集作下朕雖至彼復
有何情欲延期至來冬待看穀麥鄉等商度以為何似臣
等具奏洛陽城闕雖曰皇都至於宮苑之間制度本狹然
風土氣候不甚宜人陛下以萬姓為心萬姓以陛下為命

賀中

賀祥雲見狀二首

賀上仙公主靈應狀一首

賀昭陵徵應狀一首

辨日傍瑞氣狀一首

賀太陽不虧狀二首

為宰相論月應蝕狀一首

為政事賀雨狀一首

賀祈雨有應狀一首

賀雨晴狀一首

賀麥登狀一首

為政事賀苗稼狀一首

賀祥雲見狀

張九齡

右臣等伏見道門威儀司馬秀表稱今月十日夜陛下親臨

同明殿道場為宗廟蒼生祈福有祥雲見伏惟聖德以精

意集作至動天天意以眇嚮符聖其感甚速豈云玄遠集作其應

遠集作聖陛下肅集作聖敬之深勤恤所至靈心如答神道何言自

表休期以介景福生人大賴天下幸甚臣等忝居近侍義

百恒情謹奉狀陳賀以聞伏望宣示史館

賀彩雲見狀

張說集無

右伏奉恩旨今日屬下元賜臣等待從昇降聖闕禮謁大聖

尊容行香之際日西南有彩雲見者伏以大道無形至誠

斯應上玄降福感而遂通步輦陟於齋宮虔修香火彩雲

生於曉日遽發祥光是知聖德與天心合符萬靈與羣仙

叶贊臣叨陪侍從如昇汗漫之遊承恩禮謁更覩氤氳之

瑞榮幸之極千載一時無任欣慶之至

賀上仙公主靈應狀

張九齡

右臣等伏承今月八日上仙公主靈座有祥風瑞虹之應

爰至啓殯乃知屍集作尸解又承特稟清虛薄於滋味素含

真炁自不食鹽洎乎集作于遷神更標竒跡伏惟聖系本於

道源妙有所鍾靈異必降不然者何得幼而能悟性與非常適來以時且契於玄運超然而脫集作復升於丹籙杳冥雖遠髣像如存則知仙路有歸茲念已釋理絕今古事昭聞見況臣等親侍軒墀幸聞仙解無任感慰之至伏望宣付史館以昭靈異仍望宣示百官謹奏

賀昭陵徵應狀

前人

右御史中丞徐憚從京使還向臣等說妖賊劉志誠四日從咸陽北向集作南見昭陵山上有黑雲忽起志誠謂其凶徒云此雲將有暴風若衝頭立恐有破敗志誠久從軍伍頗解雜占其言未畢颶風果至直衝行首莫不昏迷衆心驚惶不知所出及至便橋之際並即散走又見父老云往年權梁山之徒將逞不軌當時亦有烈風暴雨發自昭陵北集作至京城賊還破滅謹參往事與今同符者伏以閭閻賤類竊敢猖狂而祖宗威靈亦已玄鑒昔年感召若命蚩尤今者驅除更徵集作風伯所以妖炁集作自殄狡計莫施頃集作刻之間逃形無路此皆神功潛運昌曆無窮將俾孫謀用昭聖德事堪懲惡可以垂後無任慶悅之至仍望宣付史館集作并示朝列謹錄奏聞謹奏

辨日旁瑞氣狀

元稹

今月二日日旁瑞氣右奉宣其日日上有橫赤五色氣鮮明黃潤日兩邊各有嘉氣內赤外青宰相稱賀云是五色雲見不知是否者臣謹按乙巳占有赤氣橫在日上謂之戴其分當益土進爵推戴人君之象又人君當立王侯封建親戚以為覆祐之徵竊見其日除王潛郭釗田布等官則陛下凡有舉措盡合天心微臣所引占書悉皆明驗伏請以戴氣宣付史官不可誤書五色雲見又云青赤短小在日

旁謂之珥微曲向日謂之抱珥者纓珥之象天子有喜兼

集作

有和親之事又當拜將抱者扶抱向就之象隣國臣

佐來降天子有喜賀之事子孫之慶臣下忠誠輔主國中
歡喜和合今北狄和親西戎通好昨者承元請命其日三
將同昇萬姓歡呼四方來賀亦可謂陛下凡有舉措盡合
天心微臣所引占書悉皆明驗伏乞講作亦以抱珥宣付
史官不可誤書五色雲見

以前件圖籍所載如右

伏以五色慶雲蓋是小瑞戴氣抱珥所謂殊祥宰臣忽遽
之間未暇精究其事此皆陛下禮行郊廟誠達神祇展百
拜而忘疲入九室而流涕近臣興感上帝垂休克呈捧日
之祥以展集作動天之德微臣同霑侍從別感恩慈方當
鼓舞之時恨不叫呼而賀然臣以為陛下特宣手勅宰臣去
今月二日卿等所言日旁五色雲見參驗圖書蓋是戴珥

之象此皆祖宗積慶特示子孫之祥豈冲昧微誠能致昊
穹之貺宜令所司擇日告廟上以奉高祖無窮之祐次以
報憲宗有截之功誕告華夷並令知悉若此則陛下感通
之德已見九霄推讓之風將傳萬葉爛然宸翰手勅以示
於天下集作煥乎天文撰詔自生於聖旨事超萬古道冠
百王伏惟天恩密賜裁察

賀太陽不虧狀

張九齡

右今月朔太史奏太陽虧據諸家曆皆蝕十分已上仍帶
蝕出者今日日出百司瞻仰光景無虧臣伏以日月之行
值交必蝕筭數先定理無推移今朔之辰應蝕不蝕陛下
聞日有變齋戒精誠外寬政刑內廣仁惠聖德日慎災祥
自弭若無表應何謂大明臣等不勝感慶之至謹奉狀陳
賀以聞仍望宣付史官以垂來裔

同前

蘇頌

臣等伏承太史奏昨一日太陽虧陛下爰發行宮不御常服聖慮淵譔默天情寅戒頓于行在不可縈社以責陰凡厥觀瞻不殊登臺而視朔自亭午過晡申寒返成春一作陽光轉大伏惟皇帝陛下續千歲之統擁三神之休道洽功成增高益厚金繩玉檢轡跡於前聞日觀雲封降祥於即事且疇人察序太史宣職以曆而推式開常度至時不蝕乃自殊祥陛下昭事於上天上天昭答於陛下若是之速其何響會非常之祉孰不忻懼臣等忝預從臣無任踴躍慶抃之至

為宰相論月應蝕狀

前人

臣近者特奉玉塔親承聖旨伏知今月十四日夜月蝕當盡此驗非遠即胡滅之祥臣以為太陰之蝕必在於望太史司占不言爾日聖人同契果應先天而不測為一作神前知者聖臣昨宵將暝精慮仰觀初則桂魄正圓俄見莫枝遂缺乙夜之後所蝕便既臣載欣載躍聞所未聞但恐默啜禍盈命危勢蹙百年之運晷刻當窮三象之微蔽虧先肇一作見臣等忝階近侍喜萬恒情無任欣躍之至

為政事賀雨狀

前人

頃者西郊不雨南陸憊陽上動聖情下憂農事一人以禹湯罪已百姓以堯舜為心知天人之合符非土龍之可致德音朝降纔出於巖廊膏澤晚飛已周於城闕麥宜早秀日助晴光禾欲潤成歲知秋穫唯皇建極天且弗違用爾作霖臣復何補既叶夢魚之吉預占鳴鶴一作之期抃躍之誠萬萬恒品

賀祈雨有應狀

張九齡

右臣等一昨面奉恩旨緣秋稼有望時雨暫愆念及黎元
見于顏色方躬自祈請誠勤夙夜上靈昭鑒嘉瑞必臻昨
日申酉之間雲物果應初含五色正覆於壇場未及終宵
更洒於城闕遂使炎埃宿潤虐暑暫清實冀膚寸之資必
集作致普天之澤臣等多昧徒仰於成造蒼生何幸每及
於聖私無任欣慶集作拚躍之至謹奉狀陳賀以聞既有
殊應仍望宣示集作史館

賀雨晴狀

前人

右今月十日高力士宣聖旨以霖雨淫集作滯有害稼穡
之憂將親禱上陽三日內不坐精意朝發而重陰夕霽乃
數日已來遂致閑朗誰謂天遠其應甚速遂得麥秋有望
蠶事且登則知至人無心與天地合契神功潛運豈陰陽
不測伏惟陛下明德自廣兢業載懷所致休徵必加謙慎
天聖相合福施羣生日用不知年和在此臣等無功集作
翊佐徒忝近密每有大猷承奉不暇無任欣戴慶躍之至

賀麥登狀

前人

右今日高力士宣垂示臣等皇太子表以嘉麥有成陛下
躬執勞事率先兆庶皇太子以集作下繼美聖功臣聞勤
於稼穡必有來麩之慶著在春秋則非他穀之比伏惟陛
下致敬宗廟屬意集作黎元春郊順時則千畝在御禁園
測候則萬寓皆豐況云立訓天人降尊農務上靈昭德已
聞瑞日增輝當夏集作不疲則有祥雲自覆是彰勛本之
化式旌造物之功人謠在茲天意可鑒且禹之盡力堯實
用心史冊美談帝王成集作範未有休徵神應若斯之盛
者也以今況古千載未聞請付史官天下幸甚臣等叨榮
近侍倍百怕情無任感戴拚躍之至

為政事賀苗稼狀

蘇頌

右臣等一昨面奉聖旨以近日暴風雨恐麥有損陛下務農在候輟膳終朝憂勞之甚起居不憚臣等聞重華之德昌發用心夏禹則為人先成湯自以身禱求諸往事未或前聞天與聖符風將雨止杲杲之日吐扶桑而已霽芄芄之野合岐麥而皆秋仍滋北里之禾更潤南山之豆京城可望不知日用之功旒宸注懷尚切在予之念臣叨陪近侍親奉德音上貽慮於納隍下增憂於折鼎無任惶悚之至

文苑英華卷第六百三十六

登仕郎胡

柯

鄉貢進士彭

叔夏

校正

賀下

賀剋捷狀一首

賀誅賊狀一首

賀退賊狀一首

賀破突厥狀一首

賀東北累捷狀一首

賀賊自相誅滅狀一首

賀破吐蕃狀一首

賀靈武破吐蕃表一首

為昭義李相公賀雲南歸附狀一首

賀破渭北党項狀一首

賀斬僕固瑒狀一首

賀破高玉狀二首

賀韓僕射充招討使狀一首

賀破賊兼優卹將士狀一首

賀行營破賊狀二首

賀剋捷狀

張九齡

右高力士宣示臣等張待賓表臣等前因奏事親承聖旨

懸料數日當

一作必

有捷書及此使至皆如眷畧但狂胡昔

誕圍逼軍州

一作州城

凶力固已困窮邊城一無所損臣等仗

料此賊早是破傷大眾自遠方來

四字集作遠來

踰月乃去馬羸

則多死人苦則計生本是烏雜之徒足為

集作

破亡之漸

此皆皇威遠讐氛侵坐銷豈伊邊人所能自保臣等幸忝

樞近承奉聖謨邊捷有符不勝慶悅謹奉狀陳賀以聞仍

望宣付史館謹奏

賀誅賊狀

前人

右蓋嘉運奏北庭解圍仍有殺獲蘇祿背德敢此讎天盡

驅犬羊來犯軍鎮雖肆凶毒欲逞其心而邊兵無遺鏃之

費狂賊有輿尸之禍此皆陛下聖武將士龔行遠必叶謀

動無遺策能令氛祲坐自廓清臣等每

集作忝

奉密謀屢承

獻捷踴躍稱慶倍百恒情謹奉狀陳賀以聞謹奏

賀賊退狀

前人

右高力士至宣勅示臣曹待仙奏狀知蘇祿遁逃集作走入

山出界者四鎮懸遠比被侵逼將士用命雖有誅鋤凶黨

集作徒尚多時集作日有抄掠兵疲矢盡為弊亦深今自奔亡

誠是震懼聖威無遠氛沴坐銷又北庭救兵當時迴旆不

費軍廩事且無憂吐蕃縱實西行蘇祿不得相應其敗可

必又無可憂邊事且寧不勝慶慰謹奉狀陳賀以聞謹奏

賀破突厥狀

前人

右張守珪表奏突厥四萬騎前月二十五日至能訖離一作雞

山契丹涅禮等前後斬獲俘馘數逾十萬突厥可汗棄甲

逃亡奚王李歸國及平盧軍將等追奔逐北計日殲滅更

聞奏者伏以突厥新立輕事用兵彼之威眾在於一舉又

兩蕃與其結隙交構未深在於邊隅猶軫天筭陛下料其

終始指授規模知其舉眾集作種盡來本自無策勞師襲遠

必合成擒使蕃騎先鋒漢軍堅壁坐觀成敗自戰蠻夷今

契丹纔交突厥已破計其奔北必至喪亡縱脫身獲全亦

舉眾皆棄醜集作北虜震懾從此氣衰東胡保邊永不攜貳

寬徭罷柝自此可期斯皆聖德遠覃皇威遐振事無遺策

舉不失圖臣等忝跡樞近親承眷略抃躍之至倍百怕情

謹奉狀陳賀以聞謹奏

賀東北累捷狀

前人

右今日劉思賢至奉宣聖旨垂示臣等破賊所由兼見守

珪表奏具承契丹累捷伏以聖武所加制勝者無失天威

不抗犯順者自亡突厥負眾背恩窮凶遠襲兩蕃懷德誓

死知集作如歸三軍奉國從命如指遂使一戰便克已聞殺

傷無筭慟哭而奔則知主將必死且蠻夷相伐我則

不勞疆場有虞義亦奚失固知無愆信於漠北有大造於
燕垂此實獨斷神謀事皆有預萬全之策永靜邊隅薄伐
之師匪勞中夏凡在黎庶孰不欣躍臣等忝預樞近倍百
恒情無任慶悅之至

賀賊自相誅滅狀

前人

右高力士宣示張守珪所上逆賊契丹屈烈及可突于等
首級此等惡稔喪敗將及故天誘其衷既降又貳而感義
之士惡其翻覆背恩之賊已就集作既誅鋤幽障廓清華夷
俱靜計其餘唯永無動搖陛下邊任先擇聖謀獨斷克稟
成命樹此戎功且知河朔無轉輸之勞林胡為賦稅之地
臣忝在樞近預聞遠績捷書之至喜倍恒情謹奉狀陳賀
以聞謹奏 開元二十二年十二月

此篇元誤編在五百六十六卷表門今移入于此

賀破吐蕃狀

張說集無

右臣等伏以涼州遙稟神筭大振天威吐蕃小醜應時摧
敗元惡渠魁乘勢俘戮隻輪疋馬坐見無遺雖虞舜之格
有苗黃軒之征涿鹿未有廓清氛祲如今日之盛者臣等
無任慶快之至

為昭義李相公賀雲南蠻歸附狀 崔行先

臣某言伏承雲南羣蠻率其類八國獻款歸附以某月日
至于闕下臣伏惟皇帝陛下端拱九重高視千古聖謨廣
運方昭不宰之功至德柔遠是有非常之慶不然者荒陬
蠻貊左衽鳥言文軌未通嗜慾有異不知父子之性獨識
皇王之恩此皆天誘其衷神助其請歸我龍德革彼狼心
豈假渡瀘之師俄同兩階之舞夏啓之征有扈高宗之伐
鬼方書之載籍適足慙耻臣限以守職藩維典茲戎旅不

獲噍噍例稱賀并舞丹墀之至

賀靈武破吐蕃表

令狐楚

此表當在五百六十七卷賀捷表門今已移入姑存其目

賀破渭北党項狀

于邵

右臣得所由報破前件賊者伏以作逆者皇穹所誅阻兵者黔首共棄此賊與懷恩同惡俱為不道一昨率其蜂虿犯我郊畿奉天之衆振其前邠州之軍制其後彼進無所入退知難歸尚肆貪狼更為封豕毆侵縣邑剽掠居人光進仗天之威首殲魁孽杜冕賈士之勇再掃殘妖既已誅其鯨鯢佇見傾其巢穴凡在戎旅孰不權欣臣忝惣兵權倍萬恒品

賀斬逆賊僕固瑒狀

前人

右臣某日於華州下邽縣東乾坑店下營伏承中使其昨日於路將逆賊僕固瑒首級過上都者伏以前件賊夷狄雜種素無令望本因行陣得踐榮班當將帥之權效錐刀之用幸憑廟筭頗立戰功陛下嘉其成效寵以非次謂能盡節翻構異端兇惡貫盈人神共棄今引頸受戮傳首而來率土之人不勝大慶子既伏罪父必成擒掃蕩妖氛在於旬日臣忝司戎律倍萬恒情遲迴路隅踴躍忘倦無任慶快之至

賀生擒高玉狀

前人

右臣得澤潞節度兼鳳翔秦隴臨洮觀察處置等使李抱玉今月二日牒稱先鋒將栢秀等十一月於南梁州大雪嶺北破前件賊黨殺戮四千五百人生擒高玉妻及男女二人并獲牛馬八千頭及器械三千餘事又得李抱玉今月日狀稱於南梁州城固縣界擒高玉詒伏以此賊因依

山險嘯聚甲兵蟻鬪郊畿之間鷓張邑屋之下西與大戎
連接北與逆豎交通更唱迭和窮兇極惡人神所棄覆載
不容李抱玉虔奉睿謀深入其阻始則俘其逆黨終用覆
此凶渠巖穴一作谷以之風行雲林由其電掃威靈遠暢兆
庶同歡在臣微誠倍萬恒品

賀破高王賊狀

前人

右臣得孫志直狀報具件如前伏以此賊嘯聚日久兇逆
實深在於邦畿頗罹辛螫既與大戎相結又共懷恩合謀
若二寇北來必為內應孫志直恭承廟筭討伐殘兇既斬
級以擒生遂傾巢而落郊蕃渠失援邊烽可息一作息臣
忝物戎倍萬恒品

賀韓僕射充招討使狀

令狐楚

右中使巨希倩至伏奉詔書吳少誠比令招討都不悛心
今以韓全義充蔡州行營招討處置等使臣當軍兵馬令
取全義指揮上官說充招討副使令臣使人詣一作於行營
所撫慰將士仍令激勵臣伏見逆賊吳少誠殘喘微生翽
飛賤品敢違帝命未即靈誅陛下天覆為心雲行其德念
日月所照九州攸同哀陷甯之中一夫不獲懸申詔旨開
賜生全而長惡未悛執迷不復凶逾殛鯨聲極吠堯今既
慎選武臣盡驅猛士威聲先路實厲於震霆剪滅剋期必
同於沃雪欣歡奮激倍百恒情當道應行營將士等悉懷
感怒畜力俟奮指蹤示處既以得人致命捐軀必應無敵
臣即準詔差人專往慰諭仍切加激勵冀申微効用答深
恩不任悃款之至

賀破賊兼優卹將士狀

前人

右中使巨希倩至伏奉詔書得全義惣率諸軍已入賊界

四月二十七日大破賊徒并擒斬生級如有身死王事者已委全義並給棺槨送歸本道令臣五年莫停衣糧者吳少誠畎澮下流不朝于海根芟弱植自絕於天狴牢之中嗚吠未已今霜鋒雲集月羽風馳既壓賊軍纔聞僂鼓將摩寇壘已見靡旗實廟堂知先勝之形校隊陳爭登之力誅鋤有次蔑殺無難凡在方隅不勝欣抃臣伏以雖忠不烈戰士所羞視死如歸武夫之志伏惟陛下弘天覆燾為日照臨載激怒肝爰收膚骨漢詔徒頒其檣擯義闕送終周詩縱畏其糗糧賞延非嗣以今觀古奮一當千臣獲守邊陲叨居將帥無任感激之至

賀行營破賊狀

前人

右臣得當道行營兵馬使李黯狀報諸軍兵馬四月十七日從臨潁縣三道齊進二十七日過潑水縣張村下營間探知桑林中有賊遂與接戰大破賊軍擒生斬級不知其數者臣伏以天道無親助其効順人生有欲患在不安今逆賊吳少誠深入禍門自沉置罟執迷不復謂暴無傷去至安而即甚危棄大順而為巨逆避日月之照干雷霆之誅尚假息于寸陰敢偷生於數刻今者將從天落兵若山行濟潑水而不濡隔偃城而欲斷長蛇之首尾如截應接自難狡兔之窟穴已焚死亡無所方當破竹猶擊芟桑刺銳氣以長驅抗威稜而直指困雖猶鬪亂不能軍既摧眾惡之鋒必喪元兇之膽以愚籌度不日掃清臣忝守戎旃無任抃躍憤激之至

賀行營破賊狀

前人

右臣得當道行營兵馬使李黯狀報今月十三日於故信州城下破賊三千人斬首七百餘級者臣伏以舉止或高

則無所措退藏多密罔或不亡一作逆賊吳少誠用已之
愚劫人為惡唯日不足謂天可逃自韓愈義稟受廟謀物齊
力士橫行於境深入其郭兵才交鋒寇已亂輶以羸師之
骸星冑穢草而腥林疲馬之命委離裝壕而咽塹寔由奪
其信幟技彼懸門遂使戰野者不知所歸守陴者無從而
出兇徒風散叛卒星分亦足以快帝怒於高天宣皇威於
下土況臣任當旄鉞誓掃氛祲慶抃之情實萬恒品所守
有限不獲稱賀闕庭無任屏營之至

文苑英華卷第六百二十七

登仕郎胡

柯

鄉貢進士彭

叔夏

校正

薦舉上

南海舉給事中穆質自代狀一首

舉杭州刺史韋臯自代狀一首

桂州舉前容管經略使嚴公素自代狀一首

舉韋況自代充太子賓客狀一首

舉楊憑自代充兵部侍郎狀一首

舉崔邠充太常卿狀一首 舉崔邠自代禮部尚書狀一首

薦道州刺史呂溫狀一首 薦昭州刺史張孫狀一首

薦劉子孟修狀一首 奏薛芳充支使狀一首

薦李晏韋楚狀一首 代人舉蔣係自代狀一首

代人舉周敬復自代狀一首

南海舉給事中穆質自代狀

馬物

右臣伏見前件官才略過人清貞出眾早居省闈鬱有政聲官叙已高時望仍重爰自出牧美績尤彰正直不回沉毅能斷伏特一作乞以臣官授之於質則必能鎮靜方域輯和蕃戎臣之才能誠所不逮官謗易召榮福難叨伏希聖慈允茲誠請則君無妄授之義臣無虛受之名不勝懇切愧覲之至

舉杭州刺史韋臯自代狀

裴冕

右臣在福建與韋臯鄰近諳其為政甚得人心逃亡悉歸遠近皆悅頃在京兆以公坐出官今領餘杭以理行高第馮異漢之名將初為赤眉所敗俄又大勝光武降璽書勞曰昔雖垂翅回谿今乃奮翼澠池可謂失之東隅收之桑榆矣臣以為韋臯之功亦馮異之比往雖小失今亦大理陛下既捨其過而使之則必必一作人心激勵其氣有倍匹夫一

言相為而死況君臣之義誰不感恩云云

桂州舉前容管經略使嚴公素自代狀

李渤

右臣伏準建中元年正月五日制觀察使上後三日舉一人自代者前件官曾任容管經略使行朝廷威恩得蠻夷畏愛可以備方隅之任物廉察之權使其處臣之官代臣之職必能獷悍柔服谿洞又安伏乞聖慈允臣所薦臣某不任誠懇之至

舉諫議大夫韋況

集本有全銜英華不錄

自代充太子賓客狀 權德輿

右伏準建中元年正月五日制常參官上後三日舉一人以自代者前件官含和抱素宴息道樞循性履方遠跡聲利徬拜諫列乞歸故山實有古風可弘集作教本伏以賓護之任道德所宜不嬰事物時謂清重正職負於三品列商皓於四人豈臣小生忽據尊秩久於塵玷自速慙尤過蒙恩私猶處優禮俯仰慙灼上負聰明賦祿命官必歸耆碩以臣負罪非所克堪推賢讓能朝有恒制大僚厚德慶洽時情謹錄奏聞謹奏

舉散騎常侍楊憑

同前

自代充兵部侍郎狀

前人

右伏準建中元年正月五日制常參官上後三日舉一人以自代者前件官曠度偉才明誠直道卓爾山立不隨波流自踐朝倫時推公器話言形於風槩聲猷發於事業庶政根本在於南宮臣以庸虛五贊其職憑積望實未階茲選物議時情共知不可輒量力以循分期類能以審官庶允至公以明朝典謹錄奏聞謹奏

舉吏部侍郎崔邠

同前

充太常卿狀

前人

右伏準建中元年正月五日制常參官上後三日舉一人以自代者前件官才茂識精密靜弘遠集作久於右掖再

履南宮儀曹取士聲實不惑少集作小宰掄材流品皆叙仗以奉常典禮首冠羣卿古今盛選不可虛授以臣愚薄累奉恩榮前後職官無非忝濫逮今獎命尤懼非宜將何以叶和人神祇肅郊祀跡邠公望當處大僚循分讓能朝有彝典謹錄奏聞謹奏

舉太常卿崔邠前同自代充禮部尚書狀

前人

右件官器行端茂文學弘深自中書舍人歷禮部吏部二侍郎太常卿皆與臣交代諳其政事伏準建中元年正月五日制常叅官上後三日舉一人以自代者臣頃待罪非據首尾四年無補休明合當譴黜聖慈寬宥猶守本官受恩之日惶駭失次又蒙特令宰臣奉宣進止獎飾慰喻至于再三謂臣更無罪過恐臣妄有憂懼承命震灼感入肺腑宰臣退免未有斯比實當怵惕之際再沐生成之恩臣以違奉近侍不合申謝慮煩省覽不敢拜章輒因舉代之時特荷非常之澤況宗伯秩禮選任重難以邠代臣實允公望謹錄奏聞謹奏

代李中丞薦道州刺史呂溫狀

溫自作集無

右臣伏以前件官操履有恒吏事精舉處繁簡肅辨獄詳明尤於撫綏實著効績今道州賦稅畢集流亡盡歸虔奉公程日至清淨委心於理古人不如衡州凋弊累年常積逋欠實藉財用以安疲黎伏望除衡州刺史臣職當廉察上奉詔條觀善薦能臣合竭節七州之事敢不精詳前件官小心理務夙夜奉公才識出人効績尤著况道州風俗獷猾前後難為緝綏自溫條理已來疲人盡皆蘇息觀其能政堪為表儀臣輒舉所職上達聖聰伏望天恩允臣所

請二云云

薦昭州刺史張孫狀 為人作

令狐楚

右臣伏準貞元六年十一月八日勅旨自今已後諸州刺史縣令以肆考如理術尤異實効可稱考滿日委觀察使錄事跡以聞特加獎擢者前件官守文惟謹持法甚精清廉有餘貞固無比臣伏見嶺南風俗惰嬾苟避征徭易成逋竄張孫憂人若已理郡如家勸課農桑置立保社移風為敦厚之境徵賦無慘急之名周旋六年其道一致臣猥司廉察忝守方隅以所見聞恐須甄錄 云云

薦劉孟修狀 為人作

前人

右件官業傳忠厚雅尚文儒貞白居心公勤守職累曾試用皆著清廉頃崔漢衡在晉州日奏授殿中侍御史充都防禦判官直道不回正詞無隱實僚之內裨益甚多知是公才豈辭 作 為參佐屢詳疑獄心盡哀矜嘗判劇曹事無留滯臣是以錄其勞効奏請改官伏蒙聖恩特授前件官令赴闕下奉詔旨不敢乞留臣伏以孟修自有幹能誠堪任使所知微分輒敢薦聞干冒宸嚴伏增戰越

奏薛芳充支使狀 為人作

前人

右件官蘊蓄公才精勤吏道文章史傳無不該通大曆末則與臣及徐泗節度使張建封同事故馬燧作判官建中三年曾以公事直言不合其意遂被奏受交城縣令及有政績衰然疲羸悉安征賦皆辦臣以其四居畿令兩任法官有學有才堪為賓佐委令推斷無不詳平與之籌畫多所裨益相諳相識二十餘年滯屈最深實希榮獎伏望天恩特賜改官充臣觀察支使

薦李晏韋楚狀 大和六年

白居易

朝議大夫前使持節海州諸軍事守海州刺

史上柱國李晏

右前件官比任海州刺史被本道節度使配諸州稅麥一例加估徵錢晏頻申論集作奏恐損百姓本使稱用軍事切不得已而從之及被人論朝廷勘覆責不聞奏除削官集作削階雖在法則四字集作誠合舉行於晏則集作即為獨屈況晏累為宰牧皆著良能清白公勤頗聞於眾自經停罷已涉三年退居洛陽窮餓至甚身典三郡家無一金據此清廉別堪優獎又建中初李正已與納連反汴河阻絕轉輸不通晏先父洧即正已堂弟為徐州刺史當叛亂之時洧以一郡七城歸國効順棄一家百口任賊誅夷開運路於集作之咽喉斷兇渠於集作之右臂遂使逆謀大挫妖寇竟消從此徐州埭橋至今永為內地如洧之子實可念之臣伏以洧之忠功不可忘晏之吏材不可棄伏希聖念量授一官庶使廉吏忠臣聞之有以集作所激勸

伊闕山平泉處士韋楚

右件人隱居樂道獨行善身斂跡市朝息機名利况家承集作傳簪組兄在班行而楚獨栖山卧雲鍊氣絕粒滋味不接於口塵埃不染其心二十餘年不改其樂志齊箕穎節類顏原搢紳之間多所稱歎臣為尹正理合集作合具薦論雖飛鴻入冥自忘飲啄而白駒在谷亦貴繫維儻蒙實彼周行縻之好爵降羔鴈之禮命助駕鷺之羽儀足以厚貞退之風遏躁進之俗茲亦盛事有裨聖朝

以前件謹具如前臣伏以念功振滯前王之令猷貢士推能長吏之本職其李晏韋楚等並居府界不踐公門臣實諳知輒敢論薦有涉塵躅無任兢惶謹具奏聞伏聽勅旨

代人舉周敬復自代狀

杜牧

前件官執德以進嚮道而行藹有令名備歷清貫掌綸言
於西掖才稱發揮叅密命於內庭衆推忠慎自珥貂近侍
主籥集作鑰
通用東門聲實益重於搢紳磨涅始彰其堅白伏以
南省實天下根本兩丞為百司管轄苟非其選必致曠集作
敗官今若以臣所任迴授敬復庶能肅清臺閣提舉紀綱既
曰陟明實不虛受伏乞天恩允臣所請

代人舉蔣係自代狀

前人

伏準某年月日勅內外文武常叅官上後三日宜舉一人
自代者伏以前件官仁義素彰文學早著揚歷臺閣宣昭
令名嘗為諫官無所避忌及領藩鎮實惠疲羸頃者不附
權臣例遷佐官集作例
遭左官今逢明代猶典小州伏以封還詔
書駁正時事職業實重選擇宜精今若以臣此官迴與蔣
係既不虛受寔曰集作
為陟明伏乞聖慈允臣所請

文苑英華卷第六百三十八

登仕郎胡

柯

鄉貢進士彭

叔夏

校正

薦舉下

為濮陽公舉人自代狀一首 為懷州刺史舉人自代狀一首

為尚書渤海公舉人自代狀二首

為滎陽公奏舉王克明等充縣令主簿狀一首

為滎陽公舉人自代狀一首 為鹽州奏舉李孚判官狀一首

為濮陽公奏韓琮等四人狀一首

為安平公奏杜勝等四人狀一首

薦前漢州刺史薛元賞狀一首

薦前淮南節度掌書記殿中御史狀一首

薦澧州刺史崔芸狀一首

薦觀察判官陸暢請章服狀一首

為濮陽公陳許舉人自代狀 李商隱

文不百廿九

盈仁

其官崔彞

右臣伏準某年月日勅内外文武官上後三日舉一人自

代者臣伏見前件官藥邵舊族鄒魯名儒鏡納無私集作

山高不讓而又循牆戒切銘座規深蘭省辭榮竹符出守

汝悲來暮晉有去思晦而轉明集作 浼而尤白既還綸閣

復掌禮闈人驚吞鳳之才士切登龍之譽集作 及司版籍

以副地官比按西羌孤忠靡失集作按比用 居然國器實

映朝倫今沔水無兵武昌非險用為廉問尚鬱廟謀臣所

部乃秦韓戰伐之鄉周鄭郊圻之邑軍踰千乘地控三州

若以代臣必為名將敢希眷澤曲遂愚衷俾寬竊位之譏

冀受集作 進賢之賞干冒陳薦無任兢越謹錄奏聞伏聽

勅旨

為懷州刺史舉人自代狀

前人

右臣伏準建中元集作二年正月五日勅内外文武官到任

三日舉一人自代者臣伏見前件官汾陽啓胄沙麓遺芳

佩觿之辰平居不戲加冠已後出言成章本以詩書綽有

機斷奉陰郭之良躅集作胤銜集作御馬鄧之明集作成規臣集作與以

其祖禰已來藩宣相接雲臺高議同承鍾鼎之餘麟閣舊

圖共著河山之誓交深志見年齊道均今河内名邦覃懷

巨郡南藩鳳闕平分晉鄭之交北控羊腸方有干戈之役

推讓雖循於故事薦聞實切於私誠伏乞聖恩特允臣志

無任感恩推賢之至謹錄奏聞伏聽勅旨

為尚書渤海公舉人自代狀 前人

某官周墀

右臣伏準某年月日勅内外文武官上後舉一人自代者

伏以京邑為四方之極咸秦乃天下之樞必命英髦以居

尹正臣謬蒙抽擢素乏材能將何以風彩章臺羽儀華園

集作省况又方營咸集作函鄩畢肇集作肇建園陵苟推擇之不先

則顛覆而斯在前件官莊栗以裕簡嚴而寬玉無寒温松

有霜雪頃居内署實事文皇引裾而外朝莫知視草而中

言罔漏洩分符近甸庶印雄藩不徇物以沽名善推誠而

立斷渾集作蕩若全器宜乎在庭儻召以急宣被之昏渥必

能明張條目峻立堤防肅千里之封畿愬集作般五都之貨

殖軒英華作燕臺禹穴無虧充奉之儀漢苑秦陵盡絕推埋之

黨特乞俯迴宸斷用授當仁免今日之叨恩冀他時之上

賞干冒陳薦兢越伏深

某官崔龜從

伏以內史故事例帶銀青尹正舊儀平揖令僕必資髦碩

方備次遷臣特以輒儒猥丁昌運位崇八座官紹三王况

駕有上僊車當晏出務煩旣置役重津途儻護爵之不思
則敗官而斯疚前件官荆岑挺價赤董揚鋒票松筠四序
之榮抱金石一定之調由中及外自誠而明昨者故鄣利
遷朝臺受律隱之清節無媿於投香江革歸資唯聞於單
舸必能集同軌之會奉因山之儀使桴鼓稀鳴建瓴流化
伏乞特迴鳳詔以命龜從成聖朝棫樸之詩減微臣維鵜
之刺干黷旒宸伏用兢惶

為滎陽公舉王克明等充縣令主簿狀

前人

以前件狀如前伏以臣所部控聯谿谿洞參錯蠻髦水接重
湖山當五嶺縱有天官注集作恣擬多緣地理幽遐或不出
上京已發徒勞之歎或暫來屬邑即聞歸去之辭既經久
而不謀亦柔良而曷寄臣謬膺庶部慮在曠官儻旬朔以
無言則賦輿而必闕前件官或膏梁遺胄或英俊下僚雖

寓遐陬久從試吏假之銅墨有意於鳴琴委以簿書不著
其棲棘旣聞績用合有甄昇一則復遠俗之凋殘一則輕
微臣之憂責苟事因請託跡涉貪殘將有負於斯人豈敢
逃於舉主伏希卑聽咸賜即直干冒宸嚴無任兢越

為滎陽公桂州舉人自代狀

前人

某官裴侔

右臣伏準某年某月日勅内外文武官上後舉一人自代
者伏見前件官邕鄉茂族洛下名生處家國以必聞善兄
弟而無瘡而又南翬耀彩東箭含筠身先較藝之場首出
觀光之籍從外府而允稱賢佐立中臺而克號清郎洎時
急昌言官登大諫揚阜常規於法服陳群盡削其封章實
於不拂之朝能守勿欺之旨臣所部俗分蠻徼地控越城
藉威畧以靖封隅資簡惠而安疲瘵願迴殊渥以授當仁

豈微敬仲

英華作豈為敬重

之才兼有伯游之長俯從牢讓方免曠

官特冀宸嚴曲垂矜許干冒陳讓惶越無任

為鹽州刺史奏舉李孚判官狀

前人

某官李孚

右件官克生公族早履官途器實幹時辯能專對加之夙
明韜略父逐旌旃頃為已知屈從吏議許休文之流浪萬
里非賒王仲宣之播遷三年未遇險而不對困且能通雖
何恤於無家良可悲其絕籍去歲以惟新之命大洽鴻私
亦既旋還合從叙用開成五年十一月十二日吏曹已注
右威衛倉曹參軍授官未謝又蒙拔名除替初云牽復仍
迫屢空京口劉生方思鵝炙洛陽蘇子已弊貂裘方今崇
唐集作帝堯敦厚之恩推魏文光榮集作榮樂之旨豈令棄良材於
散地化王孫為英華作於旅人臣素乏器能叨膺任使控綠池

本朝李中

文不中三十九

四

之要地守清澤之堅城將以宣布威靈彈壓氛祲苟咨謀
失所佐理非材豈唯劔此軍聲兼且傷於朝寄臣深自計
孚實當仁況又得於諸宗且兼通舊諸葛均有因依之分
龐士元多鹽豈裁之恩是敢輒贖宸階乞榮賓席使得盡其
風力佐彼邊陲錐處平原之囊必將顛脫劔拭華陰之士粗雪幽
沉伏請依資賜授一官充臣防禦判官干冒冕旒無任戰越
為濮陽公陳許奏韓琮等四人充判官狀 前人

韓琮

右件官早中殊科榮推雅度弦柔以直濟伏而清頃佐憲
臺且丁家難當喪而齒未嘗見既祥而琴不成聲逮此變
除未蒙抽擢臣頃居鎮守琮已列賓僚謀之既臧剛亦不
吐願稽中選榮借外藩伏請依資賜授憲官充臣節度判官

段環

右件官言思無諂集作邪學就有道屢為從事堂佐正人加以富有文辭精於草隸雋而且檢通亦不流臣所部稍遠京都每繁章奏敢茲上請乞以自隨伏請依資賜授憲官充臣節度掌書記

裴蘧

右件官魯國名儒邕鄉右族松寒更翠馬老不迷臣昔忝鑿華作監門辟為記室屬辭而夙構無異論兵而故校多歸畫集作委以前籌見其餘地伏以前任大理評事已三十三箇月比於流輩已是滯淹伏請特授憲官充臣觀察支使

夏侯曠

右件官藏器於身為仁由已齋莊難犯勁挺不搖臣任切循良集作拊循務繁稽勾思留仙尉以重宿階伏請依資改授一官充臣節度巡官

大四百三十五

卷之二十一

五

件

以前件狀如前臣四朝受任三鎮叨榮慕碣石之築官廣延儒雅効西河之擁篲樂得賢才韓琮等並無所因依不由請託久諳才地堪列幕庭伏希殊私盡允誠請謹錄奏聞伏聽勅旨

為安平公兗州奏杜勝等四人充判官狀 前人

杜勝

右件官流慶相門榮名詞苑當仁罕讓見義敢為符彩極高涯涘難挹臣前任已奏為判官臨事而每見公方與語而必相弘益今臣寄分團結集作練任切訓齊將奉廟謨實在賓彥伏請賜守本官充臣團練判官

趙哲

右件官洛下名生山東茂族仁實甚富天爵極高妙選文場亟仕侯國珪璋特達蘭杜芬馨今臣廉問大藩澄清列

部藉其墓畫畫六讚朝經伏請賜守本官充臣觀察判官

李藩

右件官文園馳聲賓階擅美口含言瑞身出禮門前任已
奏為判官馭集作遇下而和易不流臨事而貞方有執今臣
移參國用務切軍須實假平均以同計畫伏請賜本官充臣
觀察支使

盧涇

右件官博涉典經該敷流略自魯壁所壞汲冢之藏三篋
能知五車盡究加之文采兼以器能前者為臣屬僚嘗在
州推獄明斷而不容吏黠哀矜而莫有人寃今者團練之
司警巡是切每集作直思獎勅集作效非敢用情伏請依資賜
授法官充臣都團練巡官

以前件狀如前伏以長人者必以吏分勞逸開幕者亦用
士為重輕若不樹人何以報國況臣素無勲効謬竊寵榮
至於賢才敢恠筐篚前件官並推宿彥堪贊藩條伏希殊
私盡允誠請謹錄奏聞伏聽勅旨

薦前漢州刺史薛元賞狀

張次宗

右件官明敏多才幹能有用嘗列班行之任亦專繁劇之
司廣漢在蜀川之中最為大郡凋瘵之後為理甚難流庸
自占者過九千家田業開闢者踰五百頃脩兵甲則戎備
斯足置什器則公用有餘事無不周去有遺美臣任當庶
察備觀政能伏望聖恩特垂甄獎

薦前淮南節度掌書記殿中御史李躔狀 前人

右件官稟性端方臨事果毅有清介之節擅文華之名操
心不回居約可久臣去年有狀已具薦論累月在京未蒙
獎擢儻置之諫署或授以憲官視一作迹其為人必能稱職

輒再具論奏伏望天恩俯賜裁酌謹奏

薦前澧州刺史崔芸狀

前人

右伏以前件官業尚儒學才通吏事言行無玷終始可觀有古人歲寒之心得君子時中之道所歷五郡去皆見思或在危疑之中能全名節或當徵發之際不擾疲人自理澧陽課績尤異得賦歛變通之法置郵館供待之資創立隄防修繕城洫事必可以政皆有經臣任忝宣風諳其履行若在郡無此實効豈敢輒有薦論伏望聖恩特加獎擢

薦觀察判官陸暢請章服狀

前人

右件官植性謹和莅事周敏詞賦中第篇什成名應物而精力有餘處煩而變通靡滯所委公事按牘雖一作甚多巨細無遺剖斷尤速領刑獄之重人自不寃頌廉察之條法皆可以準勅文使下檢校官九至五品便得賜緋今陸暢前任祕書丞已是登朝五品即頗與格文相當又職事修舉合當甄獎臣先已有狀未蒙允許今輒再具論奏伏望天恩特賜章服

文苑英華卷第六百三十九

登仕郎胡柯 鄉貢進士彭叔夏 校正

進貢上

朝覲遇節進物狀一首

賀正進物狀五首

端午進物狀十二首

賀冬進物狀六首

進打獵口味狀一首

朝覲遇節進奉狀

鄭綱

右臣伏以古者諸侯入覲必奉贄幣或以車馬或以珪璋用展誠敬著於典禮臣謬領藩鎮獲覲闕庭幸遇昌辰又當嘉節用增聖壽以表微誠前件馬及器物謹差嶺南節度押衙某隨狀奉進至微至薄無任慙惶伏願如日之昇如天之福垂莫大之慶保無疆之休於萬億年永康四海臣不勝懇款之至

元日進馬并鞍轡狀二首為人作 令狐楚

甲

季

右臣伏以元日開歲東風發春人神大和天地交泰伏惟皇帝陛下鴻猷更始寶祚惟新協三朝之會同受萬國之歸慶臣某職當分闡屬忝維城未聳翼於丹霄空馳心於皇極前件馬并鞍轡等驅馳有度彫鏤初成願將行地之功以奉如山之壽干煩宸嚴伏增戰汗

二

右臣伏以五始混成歲為元吉四時分理春實發生伏惟陛下嗣帝鴻名受天成命百神降福願等於山河萬國歸仁思陳其玉帛臣限從戎役闕奉朝行又及新年皆成覆露每瞻初日如奉聖明前件鞍馬等稍似馴良並非滛巧冀充庭實用達邊情干冒陳獻伏增戰越

賀正進物狀

裴次元

右臣伏以青陽發春肇寶曆於茲始玄穹降祚仰聖壽而

惟新正殿嚮明班行承慶顧臣等守土列在東隅空懷捧日之心望雲何及獨闕稱觴之禮鳴佩無因瞻九重而在天空倍情而增戀前件物及衫段宣臺卓座等禮不憚輕物斯期一作展敬即當有慶用申致貢之誠情苟為珍願比負暄之獻臣其不勝感恩抃躍屏營之至

代李令公進歲節口味一十事狀

于公異

右伏以獻歲首春元辰備饗內饗具品則有常珍野食擊鮮恐資一作兼味臣昨以軍中無事畋獵出城既臨戎虜之邊且試偏裨之藝縱橫必中豈謝麗龜俯仰無遺寧憂即鹿或堪上獻輒露衷誠前件物等謹狀奉進庶裨仙篋用愧野芹無任惶懼一作悚之極

為滎陽公進賀正銀狀

李商隱

伏以運當聖日節在王春近則入金門而排玉堂歡於上

勇五

文六百四

二

思

壽遠則梯重山而浮漲海務以獻琛臣受國恩深守藩地阻明珠大貝南異於百蠻翠羽犀皮北殊於三楚前件銀出非大冶貨在中金敢以元正式陳方賄望闕憶銀臺之峻尚隔一作集仙僚瞻天仰銀一作漢之流莫階霄路馳心獻祝因物達誠干冒宸嚴不任兢越

端午進馬狀

于公異

右伏以律應蕤賓節臨端午徵彼風俗盛陳續壽之儀爰念人臣敢闕致誠之禮況朝廷叙位海內來王咸因贄幣之資用表肅恭之節臣叨承恩顧獲守邊陲朝不及於良辰禮竊憑於外物輒以前件馬并鞍等進奉殊慙駿驥微露衷誠願承端午之祥長居得一之位不勝區區之極

同前

裴次元

右臣伏以律應蕤賓日惟端午訖于四海皆馳必獻之珍

節彼南山咸祝無疆之壽臣職叨藩服守在遐方貢菲禮以展誠單微既懼傾葵心而向日捧戴何因情空愧於遼東戀益深於闕下臣某不勝感恩戰灼屏營之極

同前四首

王仲周

右伏以楚俗遺風素傳角黍野人之志每願獻芹上件衣服裁製實昧於上國針縷多慙於天造懇誠所至庶備祝堯謹遣某官隨狀奉進

二

右伏以垂衣聖代角黍良辰述職之誠願有所獻器用非寶寧備下陳之儀縑帛至微庶同長命之縷前件銀器花紗等謹遣某官隨狀奉進

三

右臣伏以千年昌運屬在聖朝五日佳辰方臨仲月臣謬司垣翰不獲稱慶闕庭對東海竊慕於朝宗望南山輒思於上壽前件銀器花紗等謹遣某官隨狀奉進

四

右伏以聖壽千年不假封人之祝嘉辰五日用申臣子之誠前件器物紗絹等不敢法外徵科皆積軍中餘羨遠塵旒宸伏用兢惶謹差某官隨狀奉進

端午進鞍馬等狀三首

令狐楚

右臣伏以五者天之成數夏者天之仁時伏以陛下用仁時而長養群生舉成數而陶甄品物是以百蠻委瑞萬國歸誠同瞻日月之光共奉乾坤之壽臣方從邊役未及周行謬宣力於清朝竊馳心於令節前件馬等柔馴既久彫飾初成敢因五日之良以續千年之慶干冒陳獻伏用兢惶

二

右伏以月旅蕤賓節惟端午天人効祉朝野交歡伏惟陛下宸極尊嚴大明光耀擁純陽之元吉保眉壽之康寧風俗既和人倫以厚前件鞍馬器物等彫鐫始就服習初成輒因五日之良以續千春之慶干冒宸宸伏增戰越

三

右伏以月惟仲夏時屬純陽當五日之良辰慶千年之聖壽華夷修貢走玉帛於寰中朝野飛歡均金石於天上臣方從戎役夙奉皇慈願竭微誠慙無遠物前件鞍馬等物令馴致稱以柔良干冒宸嚴伏增戰越

又進銀器物并竹鞋等狀

前人

右伏以月惟正陽日次南午千官拜稱觴之慶萬國陳執珪之禮將以嗣續聖壽延洪昌期一作昌延洪期蓋朝廷之舊儀乃臣子之常事前件銀器等或便於用正當其時慙經萬

五十七

文不百甲

四

思

里之遙願獻九天之上塵黷宸鑒無任戰懼

為榮陽公赴桂州在道換進賀端午銀狀

李商隱

右臣伏以隼作握丕圖而御物必相見於离推小正以辨時則盛德在夏故著為令節稽以舊章通修任土之宜仰續後天之壽臣方乘傳置未至藩維前件銀已及中塗實從前政拜章獻祝雖令尹以告新納賚展儀欲長府之仍舊謹以前觀察使楊漢公封印進上千春屬慶億載儲休繫以藩條闕覲丹墀之下徵諸貨志且媿白金為中干冒宸嚴無任兢越

為安平公赴兗海在道進賀端午馬狀

前人

右伏以浴蘭令節採艾嘉辰百辟合祝於堯年萬方宜修於禹貢臣方夙駕之部馳傳出關欲獻琛而未識土宜願祝壽而已悲日遠前件馬仗櫪斯久著鞭亦多粗覺柔馴

未嘗奔逸雖非龍孫驥子邈一舉以絕塵願陪月駟雲螭
慶千斯集作嘶於扈蹕干冒宸宸無任兢惕之至

賀冬進物狀

裴次元

右伏以履長之慶咸歡比日之休率土之濱皆祝如山之
壽況臣早參近侍出鎮遐藩望闕既遙瞻天積戀手舞足蹈
既不及於九流任土展誠空用馳於一獻輕瀆旒宸戰越
惟深前件女口及紫袍段銀壘子等謹遣某官隨狀奉進
冬至進鞍馬弓劍香囊等狀二首 令狐楚

右臣伏以建子實三微之宗黃鍾為六律之本冬氣方至
壁星正中伏惟皇帝陛下統馭天正發生陽數壽等南山
之固萬姓具瞻恩均東海之波百川皆赴臣某限從外役
叨奉殊私秉戎律以輸誠望宸居而積戀前件鞍馬等非
追風照地之駿麗無切玉穿札之堅強用媿含香名慙承
露輒備祝堯之禮願申朝禹之心干冒宸嚴無任戰越

四九

五

五

思

右伏以四海無外三冬正中伏以陛下大明燭幽鴻化御
極居玄堂而布政登觀臺以視朝受萬國之慶擁百神之
休臣守在邊陲職司戎旅朝天之路由限於山川向日之
心增勤於草木前件物等皆生其地並考於工願奉如山
之壽敢脩任土之貢干冒陳獻伏增戰越

又進鞍馬器械等狀

前人

右伏以迎日良辰書雲令節始生一陽之數首出三統之
正華裔交歡天人同慶臣某名班將帥守在封疆阻羅拜
於彤墀空注誠於紫闕一作闕前件鞍馬器械等雖無犀利
稍似馴良恭陳遠路之心願備廣庭之實干冒宸宸伏增
戰越謹遣某官隨狀奉進

又進銀酒器唾盂等狀

前人

右件銀物等非有可觀甚無所直以其方圓不礙斟挹酒漿潔白自持宜承咳唾敢因長日願獻上天干冒宸嚴無任戰越

為滎陽公進賀文銀等

二字集作狀銀乳白身狀

李商隱

右伏以黃鍾應候白琯舒和近訪晉儀禮同元日遐觀魯史事重朔朝伏惟皇帝陛下與天同休如日之盛將融漢道兼舉周正臣方駕廉車闕稱壽酒心懸土炭空循集作思太史之書身遠江湖徒積子牟之戀苟無納贖曷慶履長前件銀等稟和於天地之鑪擢粹於神仙之府豈為方賄且自地征對三品之金庶陪白壁撰集作一丸之藥請映玄霜私白身等雖長在遐鄉而生知望闕比從訓示堪備指呼冀因物以達誠竊先時而効祝七百年之卜願過成

周八千歲為春敢徼蒙叟干冒陳進兢越無任

進打獵口味狀

于邵

右伏以平野未春寒山餘雪陛下俯令畋獵遙借寵靈豐狐難脫於重寰狡兔莫遺於三窟觀同將帥藝角偏裨況節號嘉平時兼蜡祭承威稟命恩已貸於戎臣登俎充庖味宜先於君上雖八珍豐衍六禽填委輒傾誠於金鼎庶慕義於野芹前件品味謹隨狀進

文苑英華卷第六百四十

登仕郎胡

柯

鄉貢進士彭

叔夏

校正



